

Ya:su - Tabo, Fly River

1

Yoneko Epo Obamo Waduba:midaoledawate Godokono Tabo Da:kiyawaiya

Ma:t 3:1-12; Luk 3:1-18; Yon 1:19-28

1 Ya:su Kelisoko ebe Godokono Alibodawala ega:walo ebene Gudula, ebene Ya:sukono Wade Tabo dowagilimiya me ebe mabula.

2 Nanitabola, Godote dopamo ebene woki awokalimidawa Aisayado Kelisokono pe tanaloma: ebene Bukamo tabo ma kunu akuloliya,
 “Nale Kelisokono dopo apuamo naimano tabo atadawa kapalibomamo,
 ebete ebene gabo ka:posiyodiloma:.

1:2 - Ma:1 3:1

3 Iyo, lumagite bulu opolo tabo ma kunu kawonomamo ka:pegemene,
 ‘Kawodawano gabo nosiyodiloma:la:.
 Ebene gabo na:tupugaima:la!’ ”

1:3 - Ais 40:3

4 Ebe mabuma: Yonete pemaigiya. Ebete epo bulu opolo obamo eba powaduba:midaolelo, Godokono tabo ma kunu pa:kiyawaiya, “La:imano kubane olobila:wete obamo aduba:mida tanalo laema: na:pelama:la:, ebene Godote la:imano kuba egebolelametate ka:dodolomatililaema:ta.”

1:4 - Ali 13:24; 19:4

5 Ebema: epo bilibinomate Yudiya opone ega:walo Yelusalema kawo duliynomolone tolamiya Yonekono tabo olowioma:, ebene iba:te ibino kuba danawokalilamoliya, Yonete ibi Yodane Kolomolo obamo ebo waduba:midaoliya.

6 Ebe tetelo Yonekono okoli tanalo ebe epo epetapino ilukuli tanalo keba kunula:ka: eba kunua:, mabu ebete ka:molo-goeo ipo kuba kaliku kau-goeo tama batago pulinaki, ega:walo ebene bae siguniya ega:walo molo naonaki.

1:6 - 2Ela 1:8; Mat 11:8

7 Yonete Godokono tabo eba pa:kiyawaolo negiya, “Lumagi idite naimano walogabo apune ba:pena. Ebene elawo kawonomola, naimano elawo nodoliona, ebema: na wadenoa: nale opamo tuduwatate ebene agowa ukulaolema:.

1:7 - Ali 13:25

8 Nale la: obamo waduba:midaolemata, wiyasiya ebete Godokono Uliyanamo la: ka:powaduba:midaolema:ta.”

Yonete Ya:suko Obamo Daduba:midiya

Ma:t 3:13-17; Luk 3:21-22

9 Ebe tetelo Ya:suko Ga:lili opono Nasaleta duliynomolone pete, Yonete Yodane Kolomolo ebe obamo ebo aduba:midiya.

10 Ya:sute obone eba pidiwilo, ebe tetenomolo Godote ebene Unu Duliynomolo a:iyamiditalo ebo umiya, ebene ebete Godokono Uliyana umiya ebetamo bigo olamu da:piwisigiti.

11 Ebene tabote Unu Duliyomolone ma kunu piwisigiya, “A:ma: naimano kapiya Gudunomolata. Na a:ma:tamo nekalakalitam.”

1:11 - Oale 2:7; Ais 42:1; Ma:t 12:18; Mak 9:7

Saitanate Ya:suku Kuba Gabamo Kowabuga:tama: Ebetamo Da:pemaigiya

Ma:t 4:1-11; Luk 4:1-13

12 Ebe tetenomolo Godokono Uliyanate Ya:suko bulu opamo nemagatiya,

13 ebene ebete bulu opolo 40 egelamo eba nokolilo, Saitanate kuba gabamo kowabuga:tama: ebetamo ebo pemaigiya. Ebolo iyaiya elawoelawo inamabuate na:pola:niya, wiyasiya Godokono nopopiate ebe na:buiyatitiya.

1:13 - Oale 91:11-13

Ya:sute Ebene Woko Dowagilimiya

Ma:t 4:12-17; Luk 4:14-15

14 Ebene gabamaniate Yoneko idoko motamo diyatiya, ebe tetelo Ya:sute Ga:lili opamo Godokono Wade Tabo kiyawaoago ebo piya.

1:14 - Mak 6:17

15 Ebete na:pegiya, “Wade tete a:pe. Godokono Kawo Elawodawama: eda: tete tatalila, ebema: la:imano kubane olobila:wete Wade Tabo nanitabokobi na:mida:la:.”

1:15 - Ma:t 3:2

Ya:sute Namu Uwatolepi Netewa-netewa Duwatiya

Ma:t 4:18-22; Luk 5:1-11

16 Ebene Ya:suko Ga:lili Paka: balado eba tonatolo, ebete namo uwatolepi netewa ebo nulamiya, Saimonoko ega:walo ebene ekawi A:nduluko iba:te namo kamauamo na:utiya.

17 Ya:sute iba:tamo negiya, “La: na nowaloma:ena:la:, ebene nale la: epo uwatepima: ka:midilimamota.”

18 Ebe tetenomolo iba:te ibino kamau miyapate Ya:suko ebo waloma:tiya.

19 Ebene Ya:sute kela:mo walo ka:tote Sebedikono gudu Ya:imesiko ega:walo ebene ekawi Yoneko ebo ka:nulamiya, iba:te ibino pelo okoliutalo kamau akoelamolitiya.

20 Ya:sute ibi deka:la:miya, ebe tetenomolo iba:te ibino nabiwi Sebediko atepate Ya:suko ebo waloma:tiya, wiyasiya ibino nabiwino mani woko dosiyodilonamiya ebe dubu epetapiate eba:go pelo ilukulitiya.

Ya:sute Kuba Uliyanagono Dubu Wadekobi Da:midiya

Luk 4:31-37

21 Ebe tetelo Ya:sute ebe waloma:tapiago Kapeniyama duliyomolamo tolamiya. Ebene Yu epono woko: talena egelalo ebete ibino balidi ibilamole motamo tote ibi da:niyatulamiti,

22 iba:te ebene tabamo nanoanoutiya, mabu ebete Godokono elawamo iyatulamiti wiyasiya ebe ibino Godokono Totomu iyatulamepi keba kunula:ka: eba kunua:.

1:22 - Ma:t 7:28-29

23 Ebe atu tetelo kuba uliyanagono dubute ibino balidi ibilamole moto gulo nokoliti,

24 ebene ebete geatepaolo negiya, “Ya:su Nasaletate duliyomolodawa, a:ma: atamo beda: tanalo

na:kosiyodilaemene? A:ma: a kubaiaema: ka:pa:wa:? Eiyee, na iyatawala a:imano tanalo, a:ma: Godokono Wade-talena Dawalata!”

1:24 - Mak 5:7

25 Ya:sute wiyasiya ebe kawiya aniya, “A:ma: kodakodawete, ebegodone na:nemaiga!”

26 Ebene kuba uliyante geatepaoago ega:walo wageleago dubuno apene da:penemaigiya,

1:26 - Mak 9:26

27 epate ebe tanaloma: nanoanoutiya. Idite idi ananaki, idite idi ananaki, “Me beda:la:ka:? Me iya oli iyatulame tanalola:ka:? Me dubuno elawo kawonomola! Numa:la:, kuba uliyante ebene tabamo a:tudila!”

28 Ebema: nanitabola, ebe atu egelalo Ya:sukono woko osiyodilo tabote ebe Ga:lili opo kawonomamo gito tiya, iyo, piyate ebolo dilukulionamiya ibi bilibilinomate ebene tanaloma: tabo ebo na:kiyawaiya.

1:28 - Ma:t 4:24

Ya:sute Saimonokono Moto Lapino Wadekobi Da:midiya

Ma:t 8:14-17; Luk 4:38-39

29 Ebene Ya:imesiko Yoneko iba:te Ya:suago Yu epono balidi ibilamole motone pemaimite, Saimonoko A:nduluko ibi netewapino motamo tolamenomo tolamiya.

30 Ebolo Saimonokono moto lapino ape enaena gabugabuago watiti, ebene epate me kamiyaleno tanaloma: Ya:suko ebo aniya.

31 Ebema: Ya:sute ebetamo pete ebe kotamo dapadipatiya ebene gabugabute nolopoligiya, ebene ebe kamiyaletete maigate ibi mabuma: bae okalimi woko ebo wagilimiya.

Ya:sute Temetema:gopi Bilibilinomo Wadekobi Da:midioleni

Ma:t 8:16-17; Luk 4:40-41

32 Eba adimonalo egelate da:niwisigani, duliynomolo epate temetema:gopi bilibilinomo ega:walo kuba uliyangopi Ya:sutamo ebo magaeleniya,

33 ebene ibi epetapi bilibilinomate moto gigiyu dopo apulo pepola:niya.

34 Ebe tetelo Ya:sute ibi magumulo iyaiya temetema:gopi epetapi bilibilinomo wadekobi midiolenate, ega:walo kubakuba uliyana bilibilinomo epetapiagodone ebo aliboleni. Ebe kuba uliyana iyatawala Ya:suko ebe Godogodone piya, ebema: iba:te ebene tanalo kawokalima: ebete tabo gela talena ebe iyatilameni.

1:34 - Mak 3:10-12

Ya:sute Ga:lili Opo Kawonomolo Godokono Tabo Da:na:kiyawaonaki

Luk 4:42-44

35 Ebe idoko tetenomolo walo apuamo Ya:sute ebene u wata baine maiganate, ebe a:ka:tuwa: diyamoa: opamo tonate Godago tabo ebo na:kiyawaoniya.

1:35 - Ma:t 14:23; Mak 6:46

36 Ebene duiyalo Saimonoko ega:walo ebene namutupi iba:te Ya:suko wadima: da:tolamiya,

37 iba:te ebe numite nananiya, “Epo bilibilinomate a:ma: waditata.”

38 Ebema: Ya:sute iba:tamo negiya, “Kuba:, a ka:tolamiye. Nale duliynomolo epetapilo Godokono tabo ka:na:kiyawaomamo, mabu na ebema: piyamo.”

39 Ebe tetelo ebete Ga:lili opono duliyoumolo bilibilinomamo tonaki, ebene ebete Yu epono balidi ibilamole moto gulo Godokono tabo kiyawaolamenaki ega:walo ebete kuba uliyana epagodone akalibolenaki.

1:39 - Ma:t 4:23; 9:35

Ya:sute Kukulakukulago Dubu Wadekobi Da:midia

Ma:t 8:1-4; Luk 5:12-16

40 Ebene kukulakukulago dubute Ya:sutamo pete ebene pupamo pokolite ebetamo kawiya eba petowetoweolo na:pegiya, "A:imano ubi ditametana, a:ma:le na wadekobi ka:midinima:ta."

41 Ya:sute ebe kawonomamo nilakapoimilo ebene koto uwamidate ebe ologilo naniya, "Na ubila, a:ma:wadekobi nolowia!"

42 ebema: ebe tetenomolo kukulakukula temetemetete ebegodone olopoligote ebe wadekobi ebo olowiya.

43 Ebene Ya:sute ebe eba alibolo kawonomamo ma kunu aniya,

44 "A:ma: naimano tanaloma: epo akonanala:la:. Modobola a:ma: wiyasiya me tetenomolo toawete a:imano ape Godotamo kalimagono ikameodawatamo nanawokalimiye, ebene kalimagono nilakapo inamabu Godotamo akona:nikamiye, Mosesete da:kiyawaiya eba kunu. Ebe tanalote epo kiyatulaemene a:imano temetemetete olopoligi."

1:44 - Kalima 14:1-32

45 Wiyasiya ebe dubute eba tolo epo bilibilinomo na:kiyawaolamenatiya, ebema: Ya:sute duliyoumolo epetapiamo awokala toma: ka:modobiya:. Ebe tetene wagilimite ebete wiyasiya bulu opolo okolinami, ebene apune apune epate ebetamo pelamenakiya.

2

Ya:sute Ape Kodakoda Temetema:go Dubu Wadekobi Da:midia

Ma:t 9:1-8; Luk 5:17-26

1 Ebene egela epetapi dolopoligiya Ya:sute Kapeniya duliyoumolamo walo na:ka:piya. Ebete ebene motolo dokoliti epate olowiya,

2 ebema: ibi epetapi bilibilinomate da:pelamiya, moto gulo ega:walo gigiyu dopo apulo tete idi kitaniya:. Ebe tetelo Ya:sute Godokono tabo iba:tamo eba kiyawautalo,

3 netewa-netewa dubate ape kodakoda temetema:go dubu ebetamo ebo aguwatiya.

4 Mabu epo bilibilinomate ebolo na:pola:niya, ebe dubate Ya:suko niyakabamo tolaema: gabo:nola. Ebema: iba:te moto unamo nodolote, Ya:sute kebo kutitiyale iba:te ebe moto unu anabulimite temetema:go dubu bogago Ya:sutamo ebana nuwamidiya.

5 Ya:sute ibino nanitabokobi midi tanalo umilamete temetema:go dubutamo negiya, "Namutudawa, Godote a:imano kuba egebolemetate a:dodolomatilima:ta."

6 Wiyasiya Godokono Totomu iyatulamepi epetapi ebolo da:pola:niya, iba:te ebe tabo olowite ibino tepo magumulo ma kunu malagidilolitiya,

7 "Me dubu amamago kuba tabo beda:ma: kegele Godokono ololo apulo? Kuba egeboledawa

potelela:ka? Ebe Godoko kapiyatela!”

8 Ebe tetenomolo Ya:sute iyatawiya iba:te beda: tanaloma: woki kalomutiye, ebema: ebete iba:tamo negiya, “Mabu keleka: la:imano tepo magumulo me tanalo demalagidilola:witama?”

9 Me tabo kodakodala:ka: nale me temetema:go dubutamo gema:, ‘Godote a:imano kuba egebolemetate a:dodolomatilima:ta?’ O me tabo idi gema: kodakodala:ka:, ‘Maigawete, a:imano bogo lawa:wete na:toa?’

10 Ebema: nale la: kiyatulaemamota, Epono Naniwigodolo¹ elawo bitana me opolo epono kuba egebolelamete ka:dodolomatililaema:.” Ebene ebete ape kodakoda temetema:go dubutamo negiya,

11 “Nale a:ma: anamata, nemaiga! A:imano bogo mokopiamidawete motamo na:toa.”

12 Ebe tetelo ibi bilibilinomate ebe eba umitalo, me dubute maigate ebena bogo lawete samonomamo ebo tiya, ebema: iba:te nanitabonomolo anoanolo negeliya, “Godoko unamo nadipata:la:. A dopamo mako tanalo kuminakia:!”

Ya:sute Libaiko² Deka:miya

Ma:t 9:9-13; Luk 5:27-32

13 Ebe tetelo Ya:sute Ga:lili balamo walo na:ka:tiya, ebene epo bilibilinomate ebetamo da:pelamiya, ebete ibi ebo iyatulamoliya.

14 Ebene ebete eba petonatolo A:lapiyasikono gudu Libaiko ebo numiya, ebe ta:kese uwatedawala, ebete ebena woko bailo okoliti. Ebe tetelo Ya:sute ebetamo negiya, “Na nowaloma:ena:,” ebene ebete maigate Ya:suko nowaloma:tiya.

15 Ebene tete da:peso da:petiya Ya:sute ebe waloma:tapiago Libaikono motolo ilukulite bae eba nautalo, ta:kese uwatepi ega:walo Godokono Totomu uwatea:pi epetapi iba:go na:pola:niya, mabu nanitabola, makomako epo bilibilinomate Ya:suko waloma:tiya.

16 Ebema: Pa:lisi tanebapino³ totomu tabo iyatulamepi epetapi iba:te ebe tanalo dumiya, iba:te Ya:suko waloma:tapiatamo negeliya, “Ebete ta:kese mani elemasigilo uwatepi ega:walo Godokono Totomu uwatea:piago bae beda:ma: kenanakole?”

17 Ya:sute ebe tabo olowite iba:tamo negiya, “Modobo epate doketatamo a:ka:tolaema:na:, wiyasiya gabugabuagopiate ka:tolaema:na:. Iyo, piyate a:ka:tuwa: degelana ‘A modobo epola,’ na ebako epo uwatema: ka:piya:. Na wiyasiya kubakuba epo kapiya uwatema: piyamo, iba:te na kowaloma:enema:.”

Godokono Woko Osiyodiloma: Bae Naoa:no Pola:na Tanalo

Ma:t 9:14-15; Luk 5:33-35

18 Tete idilo Yoneko waloma:tapi ega:walo Pa:lisi taneba watowatopino waloma:talepi iba:te bae naoa:no pola:niya. Ebene epo epetapiate Ya:sutamo pelamete ebe napalatediya, “Keleka: mabu Yoneko waloma:tapi ega:walo Pa:lisi tanebapi iba:te iyaiya tetelo bae naoa:no da:pola:nanaka Godokono woko osiyodiloma:, wiyasiya a:ma: waloma:tapiate bae naoa:no ka:pola:nanakoa:?”

19 Ya:sute iba:tamo negiya, “Dubute kamiyale daidimene, ebe tetelo ebena namutupiate soliyomu bailo baea:no gito ba:ka:pola:nama:na:? Ao, modoboa:! Ebete iba:go eba pola:nalo soliyomu bae kapimiya kenaoma:na:.”

20 Wiyasiya kamiyale oli aidi dubute ebena kamiyale duliyoumolo ida:mo magata tete na:pe,

nanitabola, ebe egelalo ebena namutupiate ibino tepo temeteme tanaloma: bae naoa:no ka:pola:nama:na:. Ebema: numa:la:, me tete ebe la:imano kalakalago bae nao tetela mabu nale la:go bokolinamo.”

Tagala Okoli Tanalo Ega:walo Oli Okoli Tanalo

Ma:t 9:16-17; Luku 5:36-39

21 Ebene Ya:sute tabo moga:melo walo na:kegiya, “Lumagite oli kaliku apu tagala kalikuno bolegala:mo a:kowaluomene. Ebete ma kunu dosiyodilomene, oli kaliku apute tagala kaliku kanagiyamidalemene, ebene bolegalete kawonomoma: keda:mene.

22 Atu gabodo lumagite tagala gautu-goeo tama kalila:mo oli da:imi obo akalatemene, mabu oli da:imi obote tagala tama kalili ka:na:ta:pulaemene, ebene da:imi obote opamo ka:ka:liyaote da:imi obo ega:walo kalili ibi netewate kapiya tetelo ka:kubakubaoma:na:. Me mabuma: iyatawadawate oli da:imi obo olioli tama kalili kapiyamo balateonakomene.”

Wokoa: Talena Egelano Tanalo

Ma:t 12:1-8; Luk 6:1-5

23 Yu epono wokoa: talena egela idilo Ya:sute ebe waloma:tapiago kono pali magumudo eba petolamenatolo, ebe waloma:tapiate kono kenaoma: kapiyakapiya kubakubadopo ebo netapiya.

24 Ebene Pa:lisi tanebapi epetapiate Ya:sutamo negeliya, “Numa:, a:ma: waloma:tapiate wokoa: talena egela beda:ma: kadikanalite?”

2:24 - Totomu 23:25

25 Ya:sute iba:tamo negiya, “Modobola Godote ebena Bukamo dakuloliya, la: ebe tanalo nemalagidilala:. Da:ibiditamo kuba tete da:piya, ebete ebena wapata:lamepiago bae kapete dulamiti, ebene ebete beda: tanalo kosiyodiliyale?”

2:25 - 1Sa:m 21:1-6

26 Ebete Godokono Motamo nodolote, ebe Motono wokopiate Godotamo dalomonakiya ebe talena bae ebete a:nenaiya. Numa:la:, aimano totomu tabote a niyatuaemena Godotamo kalimagono ikameopiate ebe bae a:ka:tuwa: naonaka, epo epetapiate nao talenala. Wiyasiya Da:ibidite ebe bae nate, eba:go wapata:lamepiatamo dikalamoliya, Godote ebe tanalo kubama: kegiya:. Nanitabola, me tanalote Abayatakono tetelo pemaigiya, ebe Godotamo kalimagono ikameopino Unu Watodawanomola.”

2:26 - Kalima 24:5-9

27 Ebene Ya:sute iba:tamo negiya, “Numa:la:, Godote wokoa: talena egela epo walubilima: eba osiyodilolo, ebete ubi kiyatiya: wokoa: talena egelamo epono ilukuli tanalo ka:kodakodailaema:.

2:27 - Totomu 5:14

28 Ebema: nanitabola, na Epono Naniwite wokoa: talena egela namutudawama: eda:namo.”

3

Ya:sute Koto Apu A:eme Dubu Wadekobi Da:midiya

Ma:t 12:9-14; Luk 6:6-11

1 Tete idilo Yu epono balidi ibilamole motamo Ya:sute walo da:ka:nodoliya, koto apu a:eme dubute ebolo nokoliti.

2 Ebene ebe duliymolono Pa:lisi tanebapiate Ya:suko kodakodamo umitiya, ebete woko: talena egelalo ebe lumagi wadekobi midilo iba:te ebe kubama: kegelama:.

3 Ebe tetelo Ya:sute koto apu a:eme dubutamo negiya, "A:ma: maigawete, mamona:pa:."

4 Ebene Ya:sute ebe epatamo negiya, "Aimano totomu tabote kebe talena tanalo kiyatuamenale? Ale woko: egelalo wade tanalo o kuba tanalo ba:kosiyodiloma? Epo wadekobi ba:ka:midilima: o ba:ka:kubailaema:?"

Iba:te wiya tabo kegeliya;

3:4 - Luk 14:3

5 ebema: Ya:sute dowate ibino wato kodakoda tanalo umilamete, ebe mabuma: ibi tepo mibomibago eba ulamolelo ebe dubutamo negiya, "A:imano koto nuwamida," ebene ebete koto duwamidiya ebena kotote wadekobi ebo olowiya.

6 Ebe mabuma: Pa:lisi tanebapiate dowago tolamete, ebe tetenomolo iba:te Kawo Elawodubu Elodikono tanebapiago tabo ebo negeliya Ya:suko anakapuima:.

3:6 - Mat 22:15-16

Epo Bilibilinomate Ya:suko Uima: Da:pelamiya

7,8 Ebe tetelo Ya:sute ebe waloma:tapiago Ga:lili Paka:mo walo na:ka:tiya, ebene Yu epo bilibilinomate ebe tanalo olowite iba:te Ga:lili opone, Yudiya opone, ega:walo Yelusalema kawo duliymolone pelamolete ebe ebo waloma:tiya. Ega:walo epetapi bilibilinomate iyaiya mulu opone atumu a:ka:pelamoliya, iba:te Idumiya opone, Yodane Kolomo apune, Taya kawo duliymolone, ega:walo Saidono kawo duliymolone pelamoliya.

9,10 Ebene ibi magumulo Ya:sute temetema:gopi bilibilinomo wadekobi da:midoliya, temetema:gopi bilibilinomo epetapiate ebe tanalo eba iyatawaolo ebe ologioma: mupuma:tiulo da:pelamiya, ebe mabuma: Ya:sute ebe waloma:tapi nanaliya iba:te pe kadaema:, ebe epate ibino mupuma:tiui tanalamo ebe kubaimikapoma:.

3:9-10 - Mat 14:36

11 Ebe tetelo kuba uliyanagopiate Ya:suko duminakiya, iba:te ebena agowa mabuamo da:pa:gudinakiya gelatepaolo gelanakiya, "A:ma: Godokono Gudulata!"

3:11 - Luk 4:41

12 wiyasiya Ya:sute ibi kawonomamo analenaki, mabu ebe ubia:nola iba:te ebena tanalo awokalima:.

3:12 - Mak 1:34

Ya:sute Ebena 12 Alibolepi Dekala:miya

Ma:t 10:1-4; Luk 6:12-16

13 Ebe tetelo Ya:sute damela unu ida:mo da:nodoliya, ebete ebena ubi epo ebetamo peka:la:mite, iba:te ebetamo ebo tolamiya.

14 Ebene ebete ibi magumulo 12 dubu uwatete iba:tamo negiya, "La: naimano alibolepilata. Nale la: uwatemata la:le nago ilukulinama:, ebema: nale la: Godokono tabo kiyawaoma: kalibolemamota,

15 ega:walo na la:tamo elawo kikalaemamota la:le kuba uliyana epagodone kanalibola:ema:."

16 Ya:sute 12 dubu duwatiya, me ibino mailola.

Saimonoko, Ya:sute ebetamo Pita mailo idi ikamiya.

3:16 - Yon 1:42

17 Sebedikono gudu Ya:imesiko ega:walo ebena ekawi Yoneko, Ya:sute ibi netewapiatamo Bowanagese

mailo ikalamiya, ebe mailono magumu ebe ‘Tobolo Gelapate Dubula.’

3:17 - Luk 9:54

18 A:nduluko ega:walo Pilipiko,
Batolomuko ega:walo Ma:tiyuko,
Tomasiko ega:walo A:lapiyasikono gudu Ya:imesiko,
Ta:diyasiko, ega:walo Saimonoko. Me Saimono idi ebe ubila kapela Loma gabamani epago eba
gowelalo iba:te ebene Ka:inane opo ebo katepama:.

19 Ega:walo Ya:sute Keliyota duliymolodawa Yudasiko atumu akolawiya, me dubu ebe walone tetelo
Ya:suko anakapumipi dowlubiliya ebe dawala.

Ya:suko Ega:walo Biyelesibuluko⁴ Ibino Tanalo

Ma:t 12:22-32; Luk 11:14-23; 12:10

20 Ebene Ya:sute motamo da:tiya epo bilibilinomate ebetamo pelamete walo eba:go dakapaladabutiya,
ebema: Ya:suko ega:walo ebe waloma:tapi bae naoma: ka:modobiya:.

21 Ebe tetelo ebene ekakiate ebe tanalo olowite ebe laema: ebo tolamiya, mabu epate iba:tamo ma
kunu geliya, “Ebe daedalela!”

22 Ebene Godokono Totomu iyatulamepi Yeluselema kawo duliymolone da:pelamiya, ebe dubate
na:pegeliya, “Biyelesibuluko ebegodolo bokolina, iyo, ebete kubakuba uliyanano Kawodawano
elawamo alibolenako, Godokono elawamo:!”

3:22 - Ma:t 9:34; 10:25

23 Ebene Ya:sute epo ebetamo ka:la:mite oi epetapiamo eba iyatulamelo negiya, “Saitanate ebene
kubakuba uliyana lumagigodone bakalibolemene? Ao, akalibolemene.

24 Numa:la:, kapiya duliymolono epate tetedo dadikanalema:na: ebe duliymolote ka:kubamene,

25 ega:walo kapiya motono epate tetedo dadikanalema:na: ebe motono epate a:kilukulinama:na:, ibino
motote atumu ka:ka:kubamene.

26 Ebema: Saitanakono woki ma kunula, ebete ebene kubakuba uliyana epagodone akalibolemene,
mabu kebe tetelo ebete eba kunu dowagelemene ebene woko osiyodilo elawo tanalote kolopoligomene,
iyo, ebene uwomu bitana.

27 “Numa:la:, Saitanako ebe elawodubu idi keba kunula:ka: eba kunula, ega:walo ebete pilolo
duwatiya ebe epo ebe ebene moto inamabula. Ebema: epate mako elawodubuno motamo opila:ote
ebene inamabu uwatema: ubi diyatima:na:, iba:te dopamo ebe ala:mo matuomeote, ebene ebene
inamabu ebo kuwatema:na:.

28 “Na la:tamo nani tabo gemo, epono iyaiya kuba tanalo bilibilinomo Godote egebolelamete
dodolomatili iyatawala, ega:walo epate Godoko ubia: tabo degelama:na:, ebe iyaiya kuba tabono tanalo
Godote egebolelamete ka:dodolomatililaemene.

29 Wiyasiya kebe lumagite Godokono Uliyanano osiyodilo tanaloma: kubama: degemene, Godote ebe
lumagino kuba egebolemete a:ka:dodomatiminamene, ebete uwomua: tetelo ebe kubadawama:
begenakomene.”

30 Nanitabola, me tanalo Ya:sute giya mabu ebe epate ma kunu geliya, “Ebe kuba uliyanagodawala.”

Ya:sukono Menoko Ega:walo Ebena Ekaki

Ma:t 12:46-50; Luk 8:19-21

31 Ebene Ya:sukono menoko ega:walo ebena ekaki iba:te ebe uima: da:pelamiya, iba:te moto niyakabolo eba pelamota:onalona, ebete iba:tamo pema: tabo ebo nalibiya.

3:31 - Mak 6:3; Yon 2:12; Ali 1:14

32 Ebe tetelo epo bilibinomate Ya:suko niyakabolo na:pola:niya, ebena iba:te ebetamo negeliya, “Numa:, a:imano menoko ega:walo ekaki iba:te moto niyakabolo ba:pepola:na. Ibi ubila a:ma:.”

33 Ya:sute iba:tamo nowamiya, “Naimano menoko potelela:ka:, ega:walo naimano ekaki piyatela:ka:?”

34 Ebene ebete epo ebe niyakabolo da:pola:niya ulamete negiya, “Me epo ebe naimano menokobila ega:walo naimano ekakila.

35 Potele Godokono ubi tanalo dosiyodilomene, ebe lumagi naimano menokola ega:walo naimano ekawila.”

4

Kono Kikopu Aminaledawano Iyatulame Oi

Ma:t 13:1-9; Luk 8:4-8

1 Tete idilo Ya:sute Ga:lili Paka: balalo epo iyatulamiti, ebena epo bilibinomate ebetamo da:pelamiya, ebema: ebete peamo olote pe potone kela:mo nalima:tepate peamo gito okoliya, wiyasiya epate Ga:lili damela balalo pepola:niya.

4:1 - Mak 3:7-9; Luk 5:1-3

2 Ebene ebete iyaiya tanalo epetapi bilibinomo iyatulame oiamo eba awokalilamelo, iyatulame tabo idi iba:tamo ma kunu giya,

4:2 - Mat 13:34; Mak 4:33-34

3 “La: nolowiala:. Lumagi idite pali amio bai dosiyodili kono kikopu aminaola:go ebo ti.

4 Ebete aminaola:go eba tonatolo, kikopu epetapi iba:te gabamo gudiya, ebema: olaolate pelamete ebo penaiya.

5 Kikopu epetapi iba:te nokola damelamo gudiya, ebolo damela kawoa:. Ebema: iba:te samonomamo pemaimiya mabu damela bidobidoa:.

6 ebena egelate da:pioli iba:te nalawoiya mabu ibino dolodolo magumamo ka:tolamea:., iyo, iba:te ebema: samonomamo a:elaiya.

7 Kikopu epetapi iba:te moemoe uwago damelamo gudiya, ebema: ebe uwagate dapepeiya kono ebo anakapulamiya, ebena iba:te ka:noloa:.

8 Wiyasiya kikopu epetapi iba:te wade damelamo gudiya, ebema: iba:te apepeote ebo noloiya, epetapi 30 teta:mo, epetapi 60 teta:mo, epetapi 100 teta:mo bilibinomoma: eda:iya.”

9 Ya:sute walo na:kegiya, “Galagodawa, a:ma: wadenomamo nolowia!”

Ya:sukono Iyaiya Iyatulame Oino Mabu

Ma:t 13:10-17; Luk 8:9-10

10 Ebene epo bilibinomate Ya:suko datepiya, kapiyakapiya epo epetapiate ebena 12 waloma:tapiago ebetamo pelamete na:pegeliya, “A:imano iyatulame oino magumu keba kunula:ka:?”

11 Ya:sute iba:tamo negiya, “Godote Kawo Elawodawama: deda:na, ebe tanalono magumu kelawa:ema: nale la:tamo elawo ikalaimata, iyo, ebe tanalono wamina tanalo la: iyatawaimata. Wiyasiya epo epetapi eba kunua:, iba:te iyatulame oine tanalo bilibilinomo olowiote wadenomamo a:kiyatawaoma:na:.

12 Nanitabola,

‘Iba:te bowadinakoma:na:

wiyasiya a:kuminakoma:na:,

ega:walo iba:te bolowinakoma:na:

wiyasiya a:kiyatawaonakoma:na:,

ebema: iba:te ibino kubane a:kolobila:oma:na:,

ega:walo Godote ibino kuba a:kegebolelaemene.’ ”

4:12 - Ais 6:9-10; Ali 28:26-27

Kono Kikopu Aminaoledawano Iyatulame Oino Magumu

Ma:t 13:18-23; Luk 8:11-15

13 Ebene Ya:sute ebe waloma:tapiatamo negiya, “La: me iyatulame oino magumu kiyatawawita:, ebema: la: walone tetelo naimano iyatulame oi epetapino magumu keba kunu na:kiyatawaema? Me oino magumu ma kunula,

14 kono kikopu aminaoledawa ebete Godokono tabo naminaolena.

15 Ebene epo epetapiate gabamo da:gudiya, ibi ebe kono kikopu keba kunula:ka: eba kunula, iba:te tabo dolowima:na: Saitanate pete ibino tepo magumune samonomamo ka:puwatelaemene.

16 Epo epetapiate nokola damelamo da:gudiya, ibi ebe kikopula, iba:te Godokono tabo dolowima:na: kalakalago kelaema:na:,

17 wiyasiya ibino tepo magumulo dolodolo puliyala. Ebema: iba:te Godokono woko magumulo tete da:pesamo ilukula:tepate, ebene Godokono taboma: temeteme tanalate iba:tamo da:pemaimioma:na: ega:walo epate ibino tanaloma: degelama:na:, iba:te samonomamo kalautioma:na:.

18 Epo epetapi iba:te moemoe uwago damelamo da:gudiya, ibi ebe kikopula. Iba:te Godokono tabo kolowima:na:,

19 wiyasiya iba:te inamabu kawonomamo malagidilolena ega:walo ibino ilukuli tanaloma: woki bilibilinomoma: eda:ona, ebema: ibino tepo magumulo ebakobako woki bilibilinomo ba:pola:na, me wokino tanalate wade tabo eba anapakumilo, ebene iba:te a:ka:noloma:na:.

4:19 - Ma:t 19:23-24

20 Wiyasiya epo epetapi iba:te wade damelamo da:gudiya, ibi ebe kikopula. Iba:te Godokono tabo olowite, nanitabonomolo lawete ka:noloma:na:, epetapi 30 teta:mo, epetapi 60 teta:mo, epetapi 100 teta:mo ka:noloma:na:.”

Wuiki Alo Awokala Baiamo Iyati Tanalo

Luk 8:16-18

21 Ebene Ya:sute iba:tamo negiya, “Lumagite ebene wuiki alo bagowo magumamo a:kiyatimene ega:walo ebene wata bai magumamo a:kiyatimene, wiyasiya ebete awokala baiamo kiyatimene.

4:21 - Ma:t 5:15; Luk 11:33

22 Kebe waminaole tanalate da:pola:na walone tetelo Godote kawokalilaemene, ega:walo kebe ulamolea: tanalate da:pola:na walone epate alo tetelo kulamolema:na:.

4:22 - Ma:t 10:26; Luk 12:2

23 Galagodawa, a:ma: wadenomamo nolowia!”

24 Ega:walo Ya:sute iba:tamo na:kegiya, “La:le dolowiawenama ebe tanalo wadenomamo nulamenakiyala! La:le lumagi iditamo anagiyamida tanalo keba kunu kosiyodilaema, Godote la:tamo eba kunu ka:posiyodilomene, wiyasiya la:imano anagiyamida wiyate kawonomamo ka:pemene.

4:24 - Ma:t 7:2

25 Nanitabola, Godokono tabo olowima: lumagigodolo wadewade woki da:pola:na, Godote ebetamo wadewade tanalo bilibilinomo walo ka:kikameomene. Wiyasiya lumagigodolo wadewade woki pola:na:no, ebegodolo keba kapiyakapiya tanalate da:pola:na Godote ebegodone walo ka:kuwatemene.”

4:25 - Ma:t 13:12; 25:29; Luk 19:26

Kono Kikopuno Ape Tanalono Iyatulame Oi

26 Ebene Ya:sute walo na:kegiya, “Godote Kawo Elawodawama: deda:na, ebe tanalo ma kunula.

Dubute ebenu kawo pali damelamo kono kikopu daminaoli,

27 ebene ebete kowata, kemaiga, eba kunu eba wagelenalo, ebe kono wuiate pemaimite ebo apepeiya.

Wiyasiya kikopuate damela magumulo eba pola:nalo tete geyageyadopolo iba:te keba kunu dapepeona, ebe dubute kiyatawana;

28 mabu palino damelate a:ka:tuwa: inamabu noloilamena, dopamo paa ega:walo ula, ebene nao kikopu.

29 Ebema: nanitabola, nao kikopuate da:kodakodaoma:na; ebe dubute samonomamo tote

ka:netapiomene, mabu kono tapio tete a:pe.”

4:29 - Yow 3:13; Awo 14:15

Mastada Kikopuno Iyatulame Oi

Ma:t 13:31-32; Luk 13:18-19

30 Ebene Ya:sute walo na:kegiya, “Godote Kawo Elawodawama: deda:na ebe tanalo ale beda: ula:mo nakawokalima; ega:walo ebe tanalo ale kebako iyatulame oiamo na:ka:tupugaima:?”

31 Nanitabola, me opo kawonomolo kewa kikopu kawokawonomo ba:pola:na wiyasiya mastada kikopu da:pesonomola, ebema: Godote Kawo Elawodawama: deda:na ebe tanalo mastada kikopu keba kunula:ka: eba kunula.

32 Dubute daimene, ebe da:peso kikopute apete kewa epetapi bilibilinomo odoilite kawokawo katomo kuwamidaolemene, ebene olaolate pelamete kewa katomono golololo ba:pilukulionama:na.”

33 Nanitabola, epono iyatawa tanalote da:modobiya, Ya:sute ibi mako iyatulame oi bilibilinomamo iyatulamenaki.

34 Iyo, ebete Godokono tabo iyatulame oiamo kiyawaonaki, wiyasiya epo epetapi bilibilinomate ibino iyaiya duliyaomolamo walo da:ka:tolamolenakiya, ebe tetelo ebe waloma:tapiatamo oi bilibilinomono magumu diya gabodo awokalilamenaki.

Ya:sute Awa Matalukobi Da:midini

Ma:t 8:23-27; Luk 8:22-25

35 Ebe egelate didokoni, Ya:sute ebe waloma:tapiatamo negeni, “A paka: apuamo ka:na:iwaliye.”

36 Ebene iba:te epo bilibilinomo epetapi miyapanate, Ya:sute dokolini ebe waloma:tapiate ebe peamo olonate gito tolameniya. Ebe tetelo pe epetapi atumu iba:go na:ka:tolameniya,

37 ebene kawo awanomote eba maiganalo kawokawo ulono obote waloma:tapino peamo da:poloniya, pe gu obote gito tabokani.

38 Wiyasiya Ya:suko pe walogabo apulo ebenu wato ilakamo apatinate ebo watani, ebema: iba:te ebe

amutiyante nananiya, “Iyatulamedawa, a:ma: a wadenomamo beda:ma: kuama:wena:? A ka:elaomalema:!”

39 Ebene Ya:sute maiganate awa kawiya nanani, “Nolodiyoba!” ega:walo ulotamo atu tabo na:kegeni, “Nolopoloala:!” ebene awate olopoligonate paka:te matalukobi olowinomo gito olowini.

40 Ebema: Ya:sute iba:tamo negeni, “La: beda:ma: ka:toletoleawenama? La:imano nanitabokobi midi tanalo puliyala:ka:?”

41 Wiyasiya iba:te kawonomamo eba anoanonalo ibino taneba magumulo negelaniya, “Me lumagi potelela:ka:? Awa ega:walo ulo iba:te ebene tabo olowite a:tudila:!”

5

Ya:sute Kuba Uliyanagono Dubu Wadekobi Da:midia

Ma:t 8:28-34; Luk 8:26-39

1 Ebene Ya:suko ega:walo ebe waloma:tapi iba:te Ga:lili Paka: apuamo na:iwaliya Gelasa duliymolono opamo.

2 Ya:sute pene damelamo eba nodololo, kuba uliyanagono dubute eba:go alugoma: ebo piya. Ebe opo epono tanalo ma kunula, iba:te maboele nokola damela eba obobolelo iyaiya bobo ebo osiyodilolenakiya iba:te ibino a:elao epo alomoma:. Ebema: me dubute ebe a:elao epono bobo baine piya,

3 mabu ebete ebe nokola bobo magumulo okolinami. Epate ebe auli ala:mo dematuomeonakiya ebe ale ka:modobonakia;

4 iyo, tete bilibilinomolo iba:te ebene agowala kotola auli ala:mo dematuolamolemenakiya, ebete kotono ale iyailinaki ega:walo agowano ale atumu a:kiyailinaki. Nanitabola, ebete elawonomoma: eda:nami, ebema: lumagite ebe odiyoboma: modoboa:.

5 Ega:walo ebete egela ega:walo idoko bilibilinomolo nokola bobo magumulo ega:walo damela unulo eba geatepaolo, ebe a:ka:tuwa: ebene tama nokolamo danagalimionaki kalimate ebo pemaimiomenaki.

6 Ebene me dubute Ya:suko muluamo numite, ebetamo na:puligate ebene agowa mabuamo da:na:tuduwatiya,

7,8 Ya:sute ebetamo negiya, “Kuba uliyana, a:ma: me dubugodone na:nemaiga!”

Ebe tetelo ebete geatepaolo negiya, “Ya:su, a:ma: Ununomo Godokono Gudulata! A:ma:le natamo beda: tanalo na:kosiyodilaemene? Nale a:ma: Godokono mailamo anamata, natamo kuba wiya akoikanama:la:!”

5:7-8 - Mak 1:24

9 Ebene Ya:sute ebe nalatediya, “A:imano mailo potelela:ka:?”

Ebete nowamiya, “Naimano mailo Bilibilinomotela mabu a kuba uliyana bilibilinomola!”

10 Ebene ebe dubute Ya:suko kawiya eba toweomelo ebe naniya, “Nagodolo dilukulina ebe kubakuba uliyana me opone akoalibola:la:!”

11 Ebe tetelo dabirole goeogoeo bilibilinomate damela unulo naoago ebolo nowapata:lamitiya,

12 ebema: kubakuba uliyante Ya:sutamo towetoweolo negeliya, “A:ma:le a goeogoeatamo naliboa:, ale iba:tamo ka:nopila:oma:.”

13 Ebene Ya:sute modobo tabo gete ibi ebo analiya, “Na:tolama:la!” Ebe tetelo kubakuba uliyante dubugodone pemaimite goeogoeatamo ebo nopila:iya, ebema: ebe 2,000 goeogoeate damela unune puila:ote maboele damelane da:na:gudiya, obamo nololuote ibi bilibilinomate gito na:elaiya.

14 Ebe tetelo goeogoeo ulamepi dubate ebe tanalo umite ibino duliymolamo puila:ote ebe duliymolo epo ega:walo tumu motolo dilukulinamiya da:nikiyawaolamiya, epo bilibilinomate ebo pelamiya Ya:sute dosiyodiliya ebe tanalo uima:.

15 Iba:te ebetamo pemaimite, dopamo kubakuba uliyana bilibilinomago dokolinami ebe dubu ebo pumiya, ebete kaliku pulite ebolo okoliti mabu ebenu woki a:tuputupuomiya. Me mabuma: iba:te na:toletoleutiya,

16 ebene Ya:sute kubakuba uliyanagono dubutamo ega:walo goeogoeatamo kebe iyaiya tanalo kosiyodiloliyale, piyate ebe tanalo dulamiya iba:te epo epetapi ebo kiyawaolamiya.

17 Ebe tetelo ebe epate Ya:suko kawiya naniya ebete ibino opo katepama:,

18 ebene Ya:sute peamo eba ololo, dopamo kubakuba uliyanago dokolinami ebe dubute ebe ebo toweomiya, “Na niyala, a:ma:go ka:pa:mo!”

19 Wiyasiya Ya:sute ebe eba odiyobolo naniya, “A:ma: motamo na:toa. Godote a:ma:tamo keba kunu kosiyodilola:kale ega:walo a:ma: da:nilakapoimitaka, ebe kawokawo tanalonomo a:imano mabu epo na:nikiyawaolama:.”

20 Ebema: me dubute Teni Duliymolono opo kawonomamo tote, Ya:sute ebetamo dosiyodiliya ebe tanalo kiyawaolama:go tiya, ebene piyate ebe iyaiya tanalo dolowiya iba:te kawonomamo anoanoiya.

Ya:ilasite Ya:suko Da:toweomiya Ebenu Buwele Wadekobi Ka:midima:

Ma:t 9:18; Luk 8:40-42a

21 Ebene Ya:sute peago paka: apuamo walo da:ka:na:iwiya, ebete ebolo eba nokolitalo epo bilibilinomate ebetamo ebo pelamiya.

22 Ebe tetelo Yu epono balidi ibilamole moto umidawa dubu, ebenu mailo Ya:ilasitela, ebete Ya:sutamo pete ebenu agowa mabuamo pa:tuduwatate,

23 kawonomamo eba petowetoweolo na:pegiya, “Naimano buwele da:peso a:e tatalila. A:ma: pa:wete a:imano koto ebetamo na:powatila: ebete wadekobi kolowima:, ebenu ebete a:ka:emene.”

Kalima Ka:ka:liya Temetema:go Kamiyalete Ya:sukono Kaliku Dologiya

Ma:t 9:19-22; Luk 8:42b-48

24 Ebene Ya:sute me dubago to dowagilimiya, epo bilibilinomate ebe eba a:wa:midalo mupuma:tiua:go tolamitiya.

25 Ibi magumulo kamiyale idi 12 ulama tetelo kalima ka:ka:liya temetemetete uminami,

26 doketa epo epetapiate ebetamo mibomibo tanalo ikameonamiya. Iba:te ebe wadekobi ka:midiya:, wiyasiya ebe kamiyalete ebenu mani iba:tamo eba ikalamolelo dopoliyaliya, ebenu temetemetete kawodopoma: ediya.

27 Ebema: ebete Ya:sukono tanalo dolowiya epo magumamo nopegate, ebenu walogabo apune pete ebenu kaliku ebo pologiya,

28 mabu ebete nemalagidiliya, “Nale ebenu kaliku dologimo na wadekobi ebo kolowimamo.”

29 Ebene ebete Ya:sukono kaliku dologiya, ebe tetenomolo ebenu kalima ka:ka:liya tanalote dolopoligiya ebete iyatawiya ebenu ape a:modobo.

30 Wiyasiya Ya:sute iyatawiya elawote ebegodone demaigiya, ebenu ebete polobigate epo napalateda:liya, “Naimano kaliku potele kologile?”

5:30 - Luk 6:19

31 Wiyasiya ebe waloma:tapiate ebe naniya, “Me epo bilibinomate a:ma:tamo mupuma:tua:go pelamita. A:ma: ibi ulamelo beda:ma: kegeawita a:ma: potele kologita?”

32 Ya:sute ibi kowamilamiya:, wiyasiya ebete me lumagi kuima: epo ulamoliya.

33 Ebe tetelo ebe kamiyaletе iyatawiya Ya:sukono elawote ebenu ape wadekobi a:midi, ebema: ebete toletolelo anakamiago pete, Ya:sukono agowa mabuamo pa:tuduwatalo ebenu temetemeno tanalo bilibilinomo ebe ebo pa:kiyawaomiya.

34 Ya:sute ebetamo negiya, “Kamiyale, a:imano nanitabokobi midi tanalote a:ma: wadekobi a:mida:ta. A:ma: kalakalago na:toa, mabu a:ma: dumitanamiya, ebe temetemete olopoligo.”

5:34 - Mak 10:52; Luk 7:50; 17:19

Ya:sute Ya:ilasikono Buwele A:ene Dadipatiya

Ma:t 9:23-26; Luk 8:49-56

35 Ya:suko me tabo eba kiyawautalo, tabo adaepiate Yu watodawa Ya:ilasikono motone pelamete ebe napaniya, “A:imano buwele a:e, ebema: Iyatulamedawa walo akoanala: ebe wadekobi ka:pa:midima:.”

36 Ya:sute ibino tabo gito olowiatepiya, ebenu ebete Ya:ilasiko naniya, “A:ma: akotoletola:la:, a:ma: Godoko nanitabokobi na:mida:.”

37 Ebe tetelo ebete Pitako, Ya:imesiko, ega:walo ebenu ekawi Yoneko, ibi kapiya eba magatalelo epo epetapi nodiyoboliya iba:te iba:go ka:tolaema:

38 Ebene ibi a:ka:tuwa: Ya:ilasikono motamo da:nemaimiya Ya:sute epo bilibilinomo ebo nulamiya, iba:te gowelalo kawonomamo imitiya.

39 Ya:sute moto guamo nodolote ibi nananaliya, “La: bilibilinomo gowelalo beda: mabuma: kima:witama? Gudu buwele ka:eaka:, ebe u watita.”

40 Wiyasiya iba:te ebe nekalakalatitiya, ebema: ebete ibi bilibilinomo motone gito paliboliya, ebenu Ya:sute guduno menokola, nabiwila, ega:walo ebenu netewa-kapiya waloma:tapi uwatete, gudute dekapitani iba:te ebe teta:mo gito nopila:iya.

41 Ebe tetelo ebete buwele kotamo nelawete Yu epono tabamo naniya, “Talita kumi!” me tabono magumu nitana, “Buwele, nale a:ma: anamata, nemaiga!”

5:41 - Luk 7:14

42 Ebene ebe tetenomolo ebe 12 ulama tete buwelete maigate nepatiya. Piyate me tanalo dumiya iba:te kawonomamo anoanoiya,

43 wiyasiya Ya:sute ibi kawonomamo analiya, “La: me tanaloma: epo epetapi akoanala:la:!” ega:walo ebete iba:tamo na:kegiya, “Buweletamo nao inamabu nikameala:.”

Nasalete Duliynomolo Epate Ya:suko Ubia:noma: Deda:iya

Ma:t 13:53-58; Luk 4:16-30

1 Ebe tetelo Ya:sute ebe duliynomolone tote ebene okoli duliynomolo Nasaleta:mo walo da:ka:tiya, ebe waloma:tapiate ebe ebana kapimiya ka:tolamiya.

2 Ebene Yu epono woko: talena egelalo ebete balidi ibilamole motolo epo eba iyatulamitalo, ibi bilibilino epetapiate ebene tabo dolowiutiya ebema: anoanoutiya. Iba:te negeliya, “Me dubuno iyatulame tanalo mulonomola! Ebete me iyaiya tanalo kebole kiyatawile? Ega:walo ebete anoano tanalo dosiyodilolena beda: kawokawonomola:ka!”

6:2 - *Yon 7:15*

3 Ebe kapeneta dubunomola, Ma:likono gudula. A iyatawala ebene ekaki Ya:imesiko, Yausesiko, Yudasiko, ega:walo Saimonoko, iyo, ebene ekaki buwelemela:te me duliynomololo ago bilukulita.” Ebene iba:te ebe ubia:noma: eba eda:utalo

4 Ya:sute iba:tamo negiya, “Godokono woki awokalimidawa epate ebe unamo kadipatema:na:, wiyasiya ebene duliynomolo epo ega:walo ebene moto epo ega:walo ebene kalima epo, iba:te ebe ubia:noma: beda:onakoma:na:.”

6:4 - *Yon 4:44*

5,6 Ebe tetelo Ya:sute Nasalete epono nanitabokobi midia: tanaloma: kawiya la:wa:te, ebete ebene koto temetema:gopi kapiyakapiyanomatamo dowatolelamiya ibi wadekobi ebo midioliya, wiyasiya ebete ibino duliynomololo anoano tanalo epetapi osiyodilolema: ka:modobiya:, ebema: ebete ibi eba miyapalo wiyasiya iyaiya duliynomolo epetapilo iyatulama:go pata:nami.

Ya:sute 12 Waloma:tapi Dubu Daliboliya

Ma:t 10:5-15; Luk 9:1-6

7 Ebene Ya:sute ebene 12 waloma:tapi ebetamo ka:la:mite, epetapi netewa, epetapi netewa, iyaiya duliynomolamo ebo aliboliya, ega:walo ebete iba:tamo elawo ikalamiya kubakuba uliyana epagodone kanalibolema:.

8 Ebete ibi nanaliya, “La:imano tolame tetelo gaubu kapiya nuwatiyala:, wiyasiya inamabu epetapi akouwata:la:, iyo, la: baea:no, gatelea:no, ega:walo mania:no na:tolamiyala:.”

6:8-11 - *Luk 10:4-11*

9 Ega:walo modobola la: agowa inamabu ega:walo kapiyakapiya kaliku pupuliawete ebo na:tolamiyala:, pupuliono inamabu epetapi akouwata:la:.”

10 Ebene la: duliynomolo ida:mo nemaima:wete kebe moto guamo da:nodoloaema, la: ebe motolo nilukula:tepawete walone ebe motone opo ida:mo ka:ka:tolaemamota, iyo, la: moto idine moto ida:mo eba kunu akonowagela:la:.

11 Ega:walo kebe duliynomolo epate la: kalakalago uwateta:no ega:walo la:imano tabo olowia:no, ebe duliynomolo eba atepalo la:le agowano tuwae na:moda:midatepaliyala:. Me tanalote ebe epo kiyatulaemene, Godokono tete ebe na:pe ebete ibino tanalo kapanagiyamidalaemene.”

6:11 - *Ali 13:51*

12 Ebema: Ya:suko waloma:tapiate tolamete Godokono tabo na:kiyawaolamenatiya epate ibino kubane kolobila:ma:.

13 Ebene iba:te epagodone kubakuba uliyana nalibolenakiya, ega:walo iba:te temetema:gopi epetapi bilibilino olibi kikopuno iamo ibino wato dabutilamolelamenakiya, ibi wadekobi ebo midiolenakiya.

6:13 - *Yai 5:14*

Epo Bilibilinomate Ya:sukono Tanaloma: Degelanakiya

Ma:t 14:1-2; Luk 9:7-9

14 Ebe tetelo Kawo Elawodubu Elodite ebe anoano tanalo olowiya, mabu epo bilibilinomate Ya:sukono tanalo eba iyatawaolo ibi magumulo epetapiate tabo ma kunu geliya, “Yoneko epo obamo waduba:midaoledawate a:e magumune emaigi, ebema: me anoano tanalate ebegodone pemaiminaka.”

6:14 - Ma:t 16:14; Mak 8:28; Luk 3:19-20

15 Ebene epetapiate negeliya, “Ebe Elayate, Godokono woki awokalimidawala,” wiyasiya epetapiate na:kegeliya, “Ao, ebe Godokono woki awokalimidawa idila, dopamo aimano ewoniatamo da:pemaimiya ibi keba kunula:ka: eba kunula.”

16 Wiyasiya Elodite Ya:sukono tanalo dolowiya, ebete negiya, “Me dubu ebe Yonetela, nale ebenu wato dotowamidaimo, wiyasiya ebete a:ene walo a:kemaigi!”

Elodite Yonekono Wato Dotowamidamiya

Ma:t 14:3-12

17,18 Me tanalo ebe Yonete keba kunu ka:iyale ebe tanalola.

Yonete dopamo eba okolinalo, Kawo Elawodubu Elodite ebenu ekawi Pilipikono kamiyale pilolo lawiya, ebe kamiyaleno mailo Elodiyasitela. Me mabuma: Yonete Elodiko kawiya eba analo negiya, “A:ma:le ebe kamiyale laema: modoboa:, kawo kubanomola!” Ebema: Elodite ebenu gowelaopi daliboliya, iba:te Yoneko nelawete idoko moto guamo gito peba:idiliya, mabu ebete ebenu ubi niyatiya ebe osiyodilo tanalodo ebete Elodiyasiko kalakalakobi ka:midima:.

6:17-18 - Kalima 18:16

19 Ebe tetelo Elodiyasite Yonetamo dowate ebe anakapuima: ebenu ubi ebo iyatiya, wiyasiya Elodite me tanalo osiyodiloma: ubia:nola.

20 Ebete Yoneko na:tolemenami, mabu ebe iyatawala Yonete tuputupudawama: eba eda:nalo Godokono talena magumulo okolina. Nanitabola, ebete Yonekono tabo dopamo dolowiya woki bilibilima: ebo ediya, wiyasiya ebete idoko motolo eba okolinalo, Elodite ebe wadenomamo eba uminalo iyaiya tete epetapilo ebete ebenu tabo kalakalago olowinaki.

21 Ebene Elodite dawokaliya, ebe egela malagidilolo ebete kawo soliyomu osiyodiluti. Ebema: ebenu gabamani dubu, gowelaopi elawodubu, ega:walo Ga:lili opono watowatopi, ibi bilibilinomate soliyomu baiamo tolamiya. Ebe tetelo Elodiyasite wade tete ebo umiya.

22 Ebete ebenu buwele nalibote, ebete ibino ololo apulo da:pemaiti, Elodiko ega:walo eba:go da:pola:niya iba:te ebetamo nekalakalautiya. Ebene Elodite buweletamo negiya, “A:ma:le kebe ubi tanaloma: na danana:emene, nale a:ma:tamo kikaemamota.”

23 Elodite ebetamo nanitabonomolo walo na:kegiya, “A:ma: beda: tanaloma: na danana:emene, a:imano ubi diyata:emene naimano inamabu apu ega:walo naimano opo epetapi, nale a:ma:tamo kikameomamota! Naimano tabo akadikanalemo.”

24 Ebene ebe buwelete ebenu menokotamo tote na:negiya, “Na beda: tanaloma: na:ka:negemo?” Ebenu menokote naniya, “A:ma: Yoneko epo obamo waduba:midaoledawano watoma: ebe nananiye.”

25 Ebene ebe buwelete Kawo Elawodubu Eloditamo samonomamo walo ka:pete ebe napaniya, “Na ubila Yoneko epo obamo waduba:midaoledawano wato kikopu kawatago. Ka:lonomo natamo

nikanama:!”

26 Ebema: Elodite ebena tepo magumulo mibomibonomoma: ediya, wiyasiya ebete buweletamo kebe tabo kegiyale, eba:go da:pola:niya iba:te ebe tabo olowiya, ebe mabuma: ebete amoeda:ma: ka:modobiya:.

27 Ebe tetenomolo Elodite ebena gowelaodawa dubu idi eba nalibolo, ebe naniya ebete Yonekono wato ka:nelaema:, ebene ebete idoko moto guamo tote Yonekono wato ebo notowamidamiya.

28 Ebene ebete wato kawatamo niyatite buweletamo dadaiya, ebete lawete ebena menokotamo gito nikamiya.

29 Ebe tetelo Yoneko waloma:tapiate ebe tanalo dolowiya, iba:te ebena apenomo pelawete nokola bobo magumamo gito niyatiya.

Ya:sute Epo Bilibilinomatamo Bae Dikalamoleni

Ma:t 14:13-21; Luk 9:10-17; Yon 6:1-14

30 Ebene Ya:sute daliboliya ebe waloma:tapi dubate walo ebetamo ka:pelamete, iba:te kebe iyaiya tanalo epagodolo da:nosiyodiloliya ega:walo ibi keba kunu ka:niyatulamoliye, ebe tanalo bilibilinomoma: iba:te ebe na:pa:kiyawaomiya.

6:30 - Luk 10:17

31 Ebe tetelo epo bilibilinomate Ya:suko uima: odoliatepaulo wapata:lamiya, ebema: Ya:suko ega:walo ebe waloma:tapi bae naoma: tete kumiya:. Ebe mabuma: ebete ibi nanaliya, “Modobola a a:ka:tuwa: diyamo: opamo tolamete ela kanamiye,”

32 ebene iba:te ibino peago diyamo: opo ida:mo tolaema: ebo wagilimiya.

33 Wiyasiya iba:te eba tolamitalo, epo bilibilinomate ibi ulamete iyatawiya ibi piyatela:ka:. Ebema: Ya:sute kebamo ka:tutiyale, ebe iyaiya duliyoimolo bilibilino epate ebe tanalo umite, iba:te paka: balado puila:ote ebe opamo dopamo gito nemaimiya.

34 Ebene Ya:sute ebamo da:nemaigiya, epo bilibilinomo nulamete ebena tepo magumulo ibi kawonomamo na:nilakapoilamiya, mabu sipi-goeogoeate ulamedawa:no keba kunu kilukuline iba:te eba kunu pola:niya, ebema: ebete ibi iyaiya tanalo epetapi bilibilinomo eba iyatulamelo,

6:34 - Nabas 27:17; Ma:t 9:36

35 iba:te adimo teta:mo ebo nemaimioniya. Ebe tetelo ebe waloma:tapiate ebetamo pelamenate ebe napananiya, “Me epoa: opola, samamo kidokomene.

6:35 - Mak 8:1-9

36 Ebema: a:ma: ibi nalibola:, iba:te iyaiya duliyoimolamo ega:walo ea:ge motamo tolamete bae ka:nuwateoma:.”

37 Ya:sute wiyasiya ibi nanaleni, “Ao, la:le iba:tamo nao inamabu nikalamola:la:.”

Ebene iba:te ebe nalateda:niya, “A tolamete kapiya ulamano woko wiya maniamo bae uwateote, iba:tamo ebo ba:kikalamolema:? Ao, a modoboa:!”

38 Ebene Ya:sute ibi nalateda:leni, “La:godolo kebalata baete ka:pola:nale? La: tolama:wete na:nulama:la:.”

Iba:te ulamenate negelaniya, “Agodolo paibu bae ega:walo namo netewa ba:pola:na.”

39 Ebene ebete ebe waloma:tapi nanaleni, “Epo nanala:la: iyaiya taneba osiyodilolete wade uwagolo kilukulioma:.”

40 Ebema: epate iyaiya taneba bilibilinomo osiyodilolenate ebo pola:niya, taneba idi magumulo 100,

taneba idi magumulo 50, eba kunu ilukulioniya.

41 Ebene Ya:sute paibu bae ega:walo namo netewa uwatenate, Unu Duliyomolamo melenalo Godotamo kalakala tabo genate bae wakalamiolenate ebe waloma:tapiatamo gito ikalameni iba:te epatamo kikalamolenama:, ega:walo ebete atu gabodo namo netewa kuwatenate epo bilibilinomatamo ebo kikalamoleni.

42 Ebe tetelo epo bilibilinomate bae denaoniya ibino bae kape tanalo ebo olopoligolameni.

43,44 Nanitabola, ebe bae 5,000 dubate naoniya, ebene da:luiliniya ebe bae apuapuamo ega:walo namo apuapuamo Ya:suko waloma:tapiate 12 bagowo ebe owiyaoleniya.

Ya:sute Obo Unudo Da:toni

Ma:t 14:22-33; Yon 6:15-21

45 Ebe tetenomolo Ya:sute epo eba alibolenalo ebe waloma:tapiatamo negeni, “Pe lawa:wete Ga:lili Paka: apuamo na:na:iwala:la: Betasaida duliyomolamo,”

46 ebene ebete ibi bilibilinomo alibolenate, ebete damela unamo gito nodoloni Godago tabo ka:negelanama:.

6:46 - Luk 5:16

47 Didokoni waloma:tapiate ibino peago paka: tulitulinomodo eba tolamenalo, wiyasiya Ya:sute damelalo a:ka:tuwa: okolini.

48 Ebete ibi ulameni, iba:te pe elawonomamo dabidiloniya wiyasiya ibino elawo ka:modoboniya: mabu awate ibi nodiyoboleni, ebema: idoko tetelo egela walo tatalima: eba eda:nalo, ebete obo unudo iba:tamo ebo toni ibino ololo apudo ka:petonama:.

49 Wiyasiya ebete obo unudo eba tonatolo, iba:te ebe uminate oboloma: gelanate ebo gelatepaoniya, *6:49 - Luk 24:37*

50 mabu ibi bilibilinomate kubanomamo toletoleoniya.

Ebe tetenomolo Ya:sute ibi nanaleni, “Na Ya:sutela, la: ka:toletoleonala:!”

51 ebene ebete penate ibino peamo da:poloni awate gito olopoligoni. Ebe tetelo ebe waloma:tapiate kawonomamo anoanoniya,

6:51 - Mak 4:39

52 mabu iba:te ibino tepo magumulo kodakodama: eda:onamiya, iyo, ebe mabuma: Ya:sute epo bilibilinomatamo bae dikalamoleni, iba:te ebe anoano tanalono magumu ibino wokiamo nipo wadiniya.

Ya:sute Genasalete Opolo Temetema:gopi Wadekobi Da:midiolenaki

Ma:t 14:34-36

53 Ebene iba:te duiya tetelo paka: apuamo da:na:iwaliya Genasalete opono pe boboamo pe gito na:iliya.

54 Iba:te pene damelamo da:nodoloiya, piyate ebolo da:pola:niya ebe epate Ya:sukono tanalo samonomamo iyatawaote,

55 iba:te ebe opono iyaiya duliyomolamo na:puiila:iya epo epetapi ebenu pe tanalo kananalema:.
Nanitabola, Ya:sute kebe duliyomololo da:lutanaki, epate ebe tanalo dolowinakiya temetema:gopi bogago ebo magatalenakiya.

56 Iyo, Ya:sute kebe iyaiya depeso ega:walo kawokawo duliyomolo ega:walo tumu motamo da:tonaki, epate ibino temetema:gopi ebamo demagatalenakiya, iba:te ibi ebe iyaiya duliyomolono inamabu olowame baiamo eba nowadilatililo ebe ebo na:toweomenakiya temetema:gopiate ebenu kaliku kologioama:.
Ebema: nanitabola, piyate ebenu kaliku dologionakiya, iba:te wadekobi ebo olowionakiya.

7

Yu Epono Ewonino Iyatulame Tanalo

Ma:t 15:1-9

1 Ebene Pa:lisi tanebapi ega:walo Godokono Totomu iyatulamepi magumulo piyate Yelusalema kawo duliymololo woko dosiyodilolenamiya, ibi epetapiate Ya:sutamo kapimiya da:pelamiya,
 2 iba:te ebena waloma:tapi epetapi pulamiya, iba:te koto ukulaolea:no bae denautiya. Me gabodo iba:te Pa:lisi tanebapino totomu tabo ida:mo ka:tudiliya.

7:2 - Luk 11:38

3 Numa:la:, Yu epo bilibilinomono ewoniate ibi diyatulamenamiya, ibi bilibilinomate ebe atu wokilo eba ilukulinalo ebo osiyodilolenaka, ega:walo Pa:lisi tanebapiate ebe ewonino totomu tabamo atumu wadenomamo ka:tudila:ona, kebako totomu da:pesonomo idi iba:te kadikamidalena:. Me mabuma: ibino koto wadenomamo ukulaolea:no iba:te bae a:kenaoma:na:,

4 ega:walo nao inamabu olowame bailo duwateoma:na: iba:te ebe inamabu ukulaolea:no a:ka:pennaoma:na:. Nanitabola, iba:godolo obo nio kalili ega:walo iyaiya okalimiono kalili ukulaole totomu ba:ka:pola:na, iyo, ma kunu ibino ewoniate iba:tamo dikalamoliya, ebakobako totomu epetapi bilibilinomo iba:godolo ba:pola:na.

7:4 - Mat 23:25

5 Ebema: Pa:lisi tanebapiate Godokono Totomu iyatulamepiago Ya:suko nalatediya, “Beda: mabuma: a:ma: waloma:tapiate aimano ewoniate degelanakiya ebe totomuamo ka:tudila:ona:, wiyasiya ibi a:ka:tuwa: ibi kubailamete koto ukulaolea:no bae ebo naonaka?”

6 Ya:sute iba:tamo negiya, “La: mena netewa epolata! Godokono woki awokalimidawa Aisayate la:imano tanaloma: dopamo nani tabo da:kiyawaiya, Godokono Bukalo ebe tabote ma kunu itana, ‘Me epate na tabamo amamanatenena, wiyasiya ibino tepo magumuno woki na niyakabolo ka:pola:na:, mulunomolo ba:na:pola:na.

7:6 - Ais 29:13

7 Iba:te naimano mailo unamo nadipatena, wiyasiya nanitabo tanalo puliyala, iyo, iba:te me opo epono totomu Godokono Totomunomoma: midilite ebo iyatulamenaka.’ ”

8 Ebene Ya:sute walo na:kegiya, “Aisayakono tabo nanitabonomola, mabu la: Godokono Totomu Tabonomo a:miyapiyamata, wiyasiya epate degelana ebe totomuamo tudila:onamata.

9 “La: mulo eponomolata! La: Godokono Totomu Tabonomo iyabaiamo eba alomonalo, wiyasiya la:imano ewoniate degelanakiya la: ebe iyaiya tanalo kapiya osiyodilolenakomata.

10 Numa:la:, Godokono Bukalo Mosesete negiya, ‘La:imano menokobila nabila nowalubila:la:,’ ega:walo ebete na:kegiya, ‘Kebe lumagite ebena menoko o nabiwino tanaloma: kuba tabo da:kiyawaomene, la:le ebe nanakapumiyala:.’

7:10 - Maimi 20:12; 21:17; Totomu 5:16

11 Wiyasiya la: me Godokono tabo iyabaiamo alomawete negelanamata, ‘Lumagigodolo da:pola:na

ebeno menokola nabiwila walubilima:, ebete iba:tamo ikalaema: ubia:noma: deda:mene, kuba:nola. Ebete gito kegemene, 'Me inamabu talenala, nale Godotamo ikameote me inamabuamo naimano menokola nabiwila a:kowalubilimo.' '

12 Ebema: la: ebako kuba woki lumagi nemalionakomata, ebete ebena menokola nabiwila kowalubilina:.

13 Iyo, me gabodo la:imano iyatulame tanalate Godokono nani tabo iyabaiamo alomona, ebene la:le ebe atu kuba woki gabodo iyaiya tanalo epetapi bilibilinomo na:kosiyodilolenamata."

Epo Da:kubailamenaka Ebe Iyaiya Tanalo

Ma:t 15:10-20

14 Ebene Ya:sute epo ebetamo walo keka:la:mite iba:tamo negiya, "La: bilibilinomo naimano tabo olowiawete, woki wadenomamo na:tuputupuilama:la:.

15 Lumagi niyakabolo ditana ebe inamabute ebe magumamo opegate ebe a:ka:kubaimene, wiyasiya lumagino tepo magumune da:pemaima:na: ebe tanalate ebe ka:kubaima:na:.

7:15 - Ali 10:14-15

16 Galagodawa, a:ma: wadenomamo nolowia!"⁵

17 Ebene Ya:sute epo miyapate moto guamo da:nodoliya, ebe waloma:tapiate ebete beda: tabo kegiyale, ebe tabono magumuma: ebe nalatediya.

18 Ebete iba:tamo negiya, "Epetapiate woki wadenomamo ka:tuputupuilamena:, la: atumu. La: iyatawala:ka:? Nao inamabute lumagino tepo magumamo opegate ebe a:ka:kubaimene,

19 mabu nao inamabute lumagino woki mabuamo ka:tuta:, wiyasiya wapuamo tuta ebene neago ka:penemaigamene." Ebema: nanitabola, Ya:sute me tabamo nao inamabuno talena bilibilinomo iyabaiamo alomonomo alomiya.

20 Ebene ebete walo na:kegiya, "Numa:la:, lumagino tepo magumune da:pemaimioma:na: ebe tanalo kapiyate ebe ka:kubaima:na:.

21,22 mabu lumagino tepo magumune iyaiya kuba wokino tanalate pemaiminaka, ebene ebe kuba wokine me kawokawo kubate ka:pemaiminaka—buwele pilo tanalo ega:walo lumagi idino kamiyale pilo tanalo, inamabu pilo tanalo ega:walo lumagi idino inamabu ubi tanalo, dowa tanalo ega:walo lumagi anakapumi tanalo, elemasigi tanalo ega:walo lumagino mailo kubaimi tanalo, apa:mo kuba osiyodilole tanalo ega:walo iyaiya kuba olelo osiyodilole tanalo, amama tanalo ega:walo daedale wokino tanalo.

23 Iyo, nanitabola! Me kuba bilibilinomate lumagino tepo magumune pemaimite lumagi ebo ka:kubaima:na:."

Taya Duliyomolo Kamiyaleno Nanitabokobi Midi Tanalo

Ma:t 15:21-28

24 Ebene Ya:sute ebe opo atepate Taya kawo duliyomolono opamo gito tiya. Ebe tetelo ebe ubia:nola ebete kebe motamo da:nodoliya epate iyatawaoama:, wiyasiya iba:te ebe moto samamo iyatawiya.

25,26 Ebema: ebe opo kamiyale idi, ebena buwele da:peso kuba uliyanagonola, ebete Ya:sukono tanalo olowite ebetamo pete ebena agowa mabuamo eba pa:tuduwatalo ebe ebo petoweomiya, ebete ebena buwelegodone kuba uliyana kaliboma:. Wiyasiya me kamiyale Yu lumagia:.

27 ebema: Ya:sute ebetamo negiya, "Mabu keleka: nale a:ma: dowlubitama? Epate dopamo ibino guda:tamo bae nikalaema:na:. Modoboa: iba:te gudino bae epetapiatamo gito ikalaema:, mabu ebe

osiyodilo tanalo ebe gaagaatamo ikalame tanalo keba kunula:ka: eba kunula.”

28 Ebete wiyasiya Ya:sutamo negiya, “Kawodawa, a:ma:le degeawa: nanitabola, wiyasiya guda:te opamo diyalekenaka, ebe bae apuapu gaagaate naoma: modobola!”

29 Ebene Ya:sute ebetamo negiya, “Mabu a:ma: eba kunu egeata, a:ma: kalakalago motamo na:toa. Kuba uliyante a:imano buwelegodone a:nemaiga.”

30 Ebene ebe kamiyaletete motamo tote ebene buwele ebo numiya, kuba uliyante ebegodone iyalo nemaigate, ebete bogolo watiti.

Ya:sute Galo Tamiome Ega:walo Tabo Kiyawaoa: Dubu Wadekobi Da:midia

31 Ebene Ya:sute Taya opo atepate Saidono kawo duliyaomolamo tote, ebete Teni Duliyaomolamo opodo ka:petote Ga:lili Paka:mo walo gito ka:nemaigiya.

32 Ebe tetelo epate galo tamiome ega:walo tabo kiyawaoa: dubu Ya:sutamo magaete ebe na:petoweomiya ebete ebene koto ebe dubutamo kowatima:.

33 Ebene Ya:sute ebe dubu epagodone kela:mo iyabaiamo magatate, ebene koto dubuno galo magumamo ebo nowodolataoliya, ebene ebete ebene kotamo kowe meamidate dubuno mena ebo ologimiya.

34 Ebe tetelo Ya:sute Unu Duliyaomolamo melelo, ela agolamidalo Yu epono tabamo negiya, “Epa:ta!” me tabono magumu ma kunu itana, “Na:totokoliala:!”

35 Ebema: ebe dubuno galote totokoliyaote ega:walo ebene menate wadekobi dolowiya, ebete tabo wadenomamo ebo kiyawaiya.

36,37 Epate ebe tanalo dumiya iba:te anoanolo kawonomamo negeliya, “Ya:sute tanalo bilibilinomo wadenomamo osiyodilolenako. Numa:la:, ebete galo tamiolamepi tabo olowioma: wadekobi na:midiolena, ega:walo atumu tabo kiyawaoa:pi tabo kiyawaoma: wadekobi na:ka:midiolena!”

Ebene Ya:sute ibi kawonomamo analiya, “La:le epo epetapiatamo me tanalo akoawokalima:la:!” Nanitabola, iyaiya tete epetapilo Ya:sute epo ma kunu analenaki, wiyasiya iba:te ebene tabamo tudila:oa:no ebene osiyodilole tanalo gito nawokaliminakiya.

7:36-37 - Ais 35:5; Mak 1:43-45

8

Ya:sute Epo Bilibilinomatamo Bae Walo Da:kikalamoliya

Ma:t 15:32-39

1 Ebe tetelo epo bilibilinomate Ya:sutamo pelamete walo kapiyama: na:ka:pediya, ebene ibino baete dolopoligolamiya Ya:sute ebe waloma:tapi ebetamo ka:la:mite ibi nanaliya,

2 “Na me epo na:nilakapoilamitamo, mabu iba:te nago netewa-kapiya egela dilukulinata: ibino bae olopoligolami.

8:2 - Mak 6:34-44

3 Na ibi baea:no ibino duliyaomolamo dalibolemo, diyala, gabo tetelo elawoa:noma: da:ba:neda:oma:na:, mabu ibi epetapiate mulunomone pelamoliya.”

4 Wiyasiya ebe waloma:tapiate ebetamo negeliya, “Me baea: opola. Ale me epo bilibilinomatamo bae ikalamolema: modoboa:.”

5 Ebene Ya:sute ibi nalateda:liya, “La:godolo kebalata baete ka:pola:nale?”
Iba:te negeliya, “Sebeni.”

6 Ebene Ya:sute epo opamo kilukulima: danaliya, ebe tetelo ebete ebe sebeni bae apuapu uwatete Godotamo kalakala tabo ebo giya, ebene ebete wakalamiolete ebe waloma:tapiatamo gito ikalamiya iba:te epatamo kikalamolema:.

7 Ega:walo iba:godolo namo egege kapiyakapiya na:ka:pola:niya, ebene Ya:sute ebe namoma: Godotamo kalakala tabo kegete, ebe waloma:tapi nanaliya iba:te epatamo ka:kikalamolema:.

8,9 Ebe tetelo piyate ebe bae denaiya ibino bae kape tanalo ebo olopoligolamiya. Nanitabola, ebe bae 4,000 epate naiya, ebene da:luliya ebe bae apuapuamo Ya:suko waloma:tapiate sebeni bagowo ebe owiyaoliya. Ebene Ya:sute ebe epo ibino iyaiya duliynomolamo daliboliya,

10 ebe tetenomolo ebete ebe waloma:tapiago peamo olote Da:lamanuta opamo gito tolamiya.

Pa:lisi Tanebapiate Anoano Tanalo Uima: Ya:suko Daniya

Ma:t 16:1-4

11 Ebene Pa:lisi tanebapi epetapiate Ya:sutamo pelamete ebe napapaminatiya. Ibi ubila ebe kuba gabamo kowabuga:tama:, ebema: iba:te ebe naniya, “A:ma:godolo Godokono elawo ditana, ebe tanalo awokalima: anoano tanalo idi atamo nosiyodila.”

12 Ebene Ya:sute ebene tepo magumulo ela kawonomamo agolamidalo negiya, “Mabu keleka: me tete epate anoano tanalo dowadina? Na la:tamo nani tabo gemo, Godote ebene elawo awokalima: me tete epatamo anoano tanalo a:kikalaemene!”

8:12 - Ma:t 12:39; Luk 11:29

13 Ebene ebete ibi ubia:noma: eda:lo peamo olote paka: apuamo walo na:ka:na:iwiya.

Pa:lisi Tanebapi Ega:walo Elodiko Ibino Amama Tanalo

Ma:t 16:5-12

14 Ga:lili Paka: a:iwale wagilimia:no Ya:suko waloma:tapiate bae uwate tanalo na:dodomatiya, ebema: iba:godolo kapiya baenomote itani pe gulo.

15 Ebene Ya:sute ibi kawonomamo analiya, “La: wadenomamo nolowiala:! Palowa baete a:ka:tuwa: unamo demaiga, Pa:lisi tanebapi ega:walo Elodiko ibino amama tanalo eba kunula. Eiye, mako amama tanalote la:tamo akopemaigala:!”

8:15 - Luk 12:1

16 Ebema: iba:te ibino taneba magumulo tabo ma kunu geliya, “Ebate atamo me tabo nege mabu a baea:nola.”

17 Wiyasiya iba:te tabo degelitiya Ya:sute iyatawate iba:tamo negiya, “La:le baea:no pola:na tabo beda:ma: kegelawitama? La:le naimano nanitabo tanalo wadenomamo kuma:wena: ega:walo kiyatawawena:. Mabu keleka: la:le la:imano tepo magumu da:kodakodailama:wenama?”

8:17 - Mak 6:52

18,19 La: balida:gopilata wiyasiya la: kuma:wena:, iyo, la: galagopilata wiyasiya la: kolowiawena:. Nale

adimo idilo paibu bae 5,000 dubatamo dowakalamiolelamenimo, me tanaloma: la:godolo woki ba:kitanale? Ebe tetelo la: bae apuapuamo kebalata bagowo kowiyaola:wenima?"
Iba:te ebetamo nowamiya, "12 bagowola."

8:18-19 - Mak 6:41-44

20 "Ega:walo egela idilo nale sebeni bae 4,000 epatamo da:kowakalamiolelaimo, ebe tetelo la: bae apuapuamo kebalata bagowo kowiyaola:ima?"
Iba:te ebetamo nowamiya, "Sebenila."

21 Ebema: Ya:sute iba:tamo walo na:kegiya, "Mabu keleka: la:le naimano tanalo nanitabolo kiyatawawena:?"

Ya:sute Balidi Tamio Dubu Wadekobi Da:mediya

22 Ebene iba:te Betasaida duliyaomolamo da:nemaimiya, epo epetapiate balidi tamio dubu Ya:sutamoma magae, ebe ebo petoweomiya ebete ebe kologima:.

23 Ebene Ya:sute balidi tamio dubu kotamo lawete duliyaomolone kela:mo magatate, ebete ebena balida:mo kowe alomomete ebena koto watililo ebe nalatediya, "A:ma: inamabu na:kulama:wita?"

24 Ebe dubute melete negiya, "Na epo dowapata:lamita nulamitamo, wiyasiya ibi kewamula."

25 Ebene Ya:sute ebena koto ebe dubuna balida:mo walo da:kowatiliya, ebete kawonomamo melete ebena balidite wadekobi ebo olowiomiya, iyo, ebe tetelo ebete inamabu bilibilinomo wadenomamo ebo ulamoliya.

26 Ebene Ya:sute ebe naniya, "A:imano motamo tonomo na:toa, me duliyaomolamo walo akopa:la:."

Pitate Ya:sukono Nanitabo Tanalo Dawokalimiya

Ma:t 16:13-20; Luk 9:18-21

27 Ebene Ya:sute ebe waloma:tapiago Sisaliya-Pilipai opono iyaiya duliyaomolamo eba tutalo, gabo tetelo ebete ebena waloma:tapi nanalateda:liya, "Epate na poma: kegelanake?"

28 Iba:te negeliya, "Epetapiate a:ma: Yoneko obamo waduba:midaoledawama: gelanaka, epetapiate a:ma: Elayako Godokono woki awokalimidawama: gelanaka, ega:walo epetapiate a:ma: Godokono woki awokalimidawa idima: gelanaka."

8:28 - Mak 6:15

29 Ebene Ya:sute ibi nalateda:liya, "Wiyasiya la:le na poma: ka:midina:wenama?"

Pitate ebetamo nowamiya, "A:ma: Kelisotela, Godokono Alibodawalata!"

8:29 - Yon 6:68-69; Mak 9:9

30 Ebene Ya:sute ebe waloma:tapi kawiya analiya, "La:le naimano tanaloma: epetapi akokiyawaolama:la:."

Ya:sute Ebena A:e Tanaloma: Dopamo Degiya

Ma:t 16:21-28; Luk 9:22-27

31 Ebene Ya:sute ebe waloma:tapi eba iyatulamitalo negiya, "Epono Naniwi epagodone kawokawo

temeteme walone kuwatemene, Godokono ubila. Iyo, Godotamo kalimagono ikameopino watowatopi, ega:walo Godokono Totomu iyatulamepi, ega:walo kawokawo dubu epetapi iba:te ebe ubia:noma: keda:oma:na:, ebene epate ebe kanakapuima:na: wiyasiya netewa-kapiya egelalo ebete a:ene walo ka:kemaigamene.”

32 Ebete me tabo iba:tamo degiya, Pitate Ya:suko waloma:tapi epetapiagodone kela:mo magatate ebe tabono tanaloma: ebe kawiya ebo naniya.

33 Ebene Ya:sute olobigate, waloma:tapi epetapi ulamete Pitako kawonomamo analo negiya, “Pita, a:ma: Saitanako keba kunula:ka: eba kunula! Na natepana: mabu a:imano woki Godotamo kiyata:wita:, a:ma: epono wokilo okolinata!”

34 Ebema: Ya:sute epo bilibilinomo ebe waloma:tapiago ebetamo ka:la:mite ibi nanaliya, “Kebe lumagite na waloma:enema: ubi diyatimene, dopamo ebete ebene tanalo dodolomatilite ebene kewa olotolowa agute na ebo nowaloma:enemene.

8:34 - Mat 10:38-39; Luk 14:27

35 Nanitabola, kebe lumagite ebene igilo nagodone damoeda:mene ebene igilote kalatidimene, wiyasiya kebe lumagite Godokono Wade Tabo kiyawaoma: ebene igilo na mabuma: datutimene ebete nanitabo igilo kelaemene.

36 Ebema: lumagite opono inamabu bilibilinomo uwatenomo eba uwatelo, ebene igilo datutimene ebe lumagino wiya keleka:?

37 Ebete ebene igilo walo ka:kelaema: beda: inamabu na:kikaemene? Gabo puliyala, kitana:.

38 Numa:la:, me tete epate kubakubanomoma: eda:ote, iba:godolo Godoko nanitabokobi midi tanalo puliyala. Ebema: kebe lumagite natamo ega:walo naimano taboma: dilipomene, na Epono Naniwite atumu ebetamo kilipomamo, iyo, nale naimano Nabiwino elawo alonomago ega:walo ebene wade-talena nopopiago da:pemo, ebe tetelo ebe ka:pilipoimamo.”

8:38 - Mat 10:33

9

1 Ebene Ya:sute iba:tamo walo na:kegiya, “Na la:tamo nani tabo gemo, me tetelo dilukuliona ibi epetapiate Godokono Kawo Elawodawano tetete elawago da:pemene, ebe kawo tanalo dopamo umite walone ebo ka:elaoma:na:.”

9:1 - Mak 13:30

Godokono Elawo Alonomote Ya:sukono Ape Da:pukuimiya

Mat 17:1-13; Luk 9:28-36

2 Ebene sikisi egela dolopoligiya Ya:sute Pitako, Ya:imesiko, ega:walo Yoneko damela ununomo ida:mo magataliya, iba:te a:ka:tuwa: ebolo ka:na:pola:nama. Ebe tetelo ibino dopo apulo Ya:sukono apete iyama: eba editalo,

9:2-7 - 2Pit 1:17-18; Ali 3:22

3 ebene pupuliono inamabuate pukuilamete keyakeyanomoma: nanitabolo eda:omitiya, me opo kawonomolo lumagi idite kaliku ma kunu ukulalelo keyakeyanomoma: midiolema: modoboa:.

4 Ebene waloma:tapino ololo apuamo Moseseko ega:walo Elayako iba:te pemaimite Ya:suago tabo ebo gelitiya.

5 Ebe tetelo Pitate Ya:sutamo negiya, “Iyatulamedawa, ale malo da:pola:nama:, kalakala kawonomola. Modobola a nupunupu netewa-kapiya ketemotemalema:, idi a:imanola, idi Mosesekonola, idi

Elayakonola.”

6 Nanitabola, waloma:tapiate kawonomamo toletoleutiya, ebema: Pitate woki wadenomamo malagidiloa:no ebe tabo gito giya.

7 Ebene temate pete ibi dapanalopamidaliya, tabote tema magumune ma kunu piya, “Me naimano kapiya Gudunomola, na ebetamo nekalakalitamo. La: ebenu tabo nolowiala:!”

8 Wiyasiya ebe tetelo iba:te opo samonomamo umiote Moseseko Elayako ibi walo kulamiya:, Ya:suko kapiyate iba:go ebolo utiti.

9 Ebene iba:te unu damelane eba piwitiolo Ya:sute ibi napanaliya, “La:le kebe tanalo kuma:ema, ebe tanalo me tetelo epetapi akoanala:la:, wiyasiya na Epono Naniwite a:ene walo da:kemaigamo, la: epo ebo kanalemamota.”

10 Ebema: iba:te ebe tanalo tepo magumamo iyatiya, wiyasiya a:ene maiga tanalono magumuma: ibino taneba magumulo gelitiya.

11 Ebene iba:te Ya:suko nalatediya, “Beda: mabuma: Godokono Totomu iyatulamepiate degelanaka, Elayate dopamo pete, ebenu walogabo apune Kelisote ka:pemene?”

12 Ya:sute iba:tamo negiya, “Nanitabola, Elayako dopamo pete iyaiya tanalo bilibilinomo ka:pa:tuputupuilaemene. Wiyasiya Godokono Bukalo tabo idi ma kunu ba:kitana, Epono Naniwi temeteme bilibilinomo kuwatemene ega:walo epate ebe ubia:noma: keda:oma:na:. Me tabono magumuma: la:imano woki keba kunu ka:pola:nale?

9:12 - Ma:l 4:5; Oale 22:1-18; Ais 53:3

13 Na la:tamo negemo, Elayako epatamo iyalo a:pi⁶ wiyasiya iba:te ibino ubilo kawokawo kuba ebetamo osiyodilolenakiya, Godote ebenu Bukalo dopamo degiya eba kunu.”

9:13 - Ma:t 11:14

Ya:sute Kuba Uliyanagono Koi Wadekobi Da:midia

Ma:t 17:14-21; Luk 9:37-43a

14 Ebene iba:te waloma:tapi epetapiatamo pemaimite, epo bilibilinomate iba:go eba pola:nalo ebo pulamiya. Ebe tetelo Godokono Totomu iyatulamepiate Ya:suko waloma:tapiago eba apamineuteitalo, 15 wiyasiya epate Ya:suko dumiya iba:te kawonomamo la:wa:olo ebetamo puila:ote nilakapo tabo ebo negeliya.

16 Ebene Ya:sute ebe waloma:tapi nalateda:liya, “Mabu keleka: la: me dubago dapamineutea:witama?”

17 Ebe tetelo epo bilibilinomo magumulo lumagi idite Ya:sukono tabo eba wiyalo negiya, “Iyatulamedawa, na naimano gudu a:ma:tamo emaga:kamo mabu ebe kuba uliyante anagalimiona, ebema: ebe tabo kiyawaoma: modoboa:.

18 Kebe tetelo kuba uliyante ebe walo dakanagalimiomene opamo ka:peneba:idilomene, ebenu ebete lalo eba oliomolelo pakote ebenu tabo magumune pemaimiomete, ebenu apete kodakodanomoma: ebo keda:mene. Nale a:ma: waloma:tapi anala:kamo iba:te kuba uliyana kaliboma:, wiyasiya iba:godolo elawo puliyala.”

19 Ebema: Ya:sute iba:tamo negiya:, “Eiye, la: nanitabokobi midia: epolata! La: natamo mibo ikanamenamata, ebema: na ubia:nola la:go tete geyageyalo okolinama:! La: koi natamo nemaga:la:!”

20 Ebene iba:te ebe koi Ya:sutamo demagatiya, kuba uliyante Ya:suko umite koi ebo anagalimiya. Koite opamo gate wageleolo eba igiligautalo ebene tabone pakote pemaimiomitiya.

21 Ebe tetelo Ya:sute koino nabiwi nalatediya, “Ebe me tanalo kebako tetelo kowagilimile?”

Ebete nowamiya, “Gudu da:peso tetelo wagilimi.

22 Tete bilibilinomo kuba uliyante ebe elamo keba:idilo, ega:walo obamo keba:idilo, eba kunu wagenela ebe kanakapuima:. Ebema: a:imano elawo tanalo modobola:ka: a kowalubima:? Elawote modobolo ditametana, a nilakapoiamelu ebe nowalubiye.”

23 Ya:sute ebetamo negiya, “Mabu keleka: a:ma:le naimano elawo tanaloma: danana:wa:? Me tanalo naimano tanalola:, ebe a:imano tanalola! Modobola a:ma: Godoko nanitabokobi na:mida:, ebene a:ma:godolo elawo bitanamene iyaiya tanalo bilibilinomo osiyodilolema:.”

9:23 - Ma:t 21:21; Mak 11:23

24 Ebe tetenomolo koino nabiwite kawonomamo negiya, “Na nanitabokobi na:miditamo wiyasiya naimano nanitabokobi midi tanalo da:pesola. Kawokobi na:midinama:!”

25 Ebene epo epetapi bilibilinomate eba pelamenapelo, Ya:sute ibi ulamete kuba uliyana kawiya analo negiya, “Taboa:dawa ega:walo galo tamiome uliyana, nale a:ma: nanamata, ebegodone nemaigawete na:toa! Walo ebetamo akopopegala:!”

26 Ebe tetelo kuba uliyante kawiya gepatelo koi opamo ba:idilote, ebene koite kubanomamo wageleolo kuba uliyante ebegodone da:nemaigiya, ebete a:emu ebo kapitani. Ebe mabuma: epetapiate negeliya, “Ebe a:e,”

9:26 - Mak 1:26

27 wiyasiya Ya:sute ebe kotamo lawete dadipatiya ebe ebo maigiya.

28 Ebene Ya:sute moto guamo da:nopegiya, epo epetapino pola:na: tetelo ebe waloma:tapiate ebe nalatediya, “Mabu keleka: ale kuba uliyana aliboma: ka:modobaka:?”

29 Ebete ibino tabo eba wiyalo negiya, “Kebe dawate ebene okoli magumulo Godago tabo degelanaka, ebe kapiyate mako kuba uliyana kalibomene.”

Ya:sute Ebene A:e Tanaloma: Walo Da:kegiya

Ma:t 17:22-23; Luk 9:43b-45

30 Ebene iba:te ebe duliynomolo atepate Ga:lili opodo eba petolamelu, Ya:suko ubia:nola ebete kebolo ka:lutiya:le epate iyatawaoma:,

9:30 - Yon 7:1

31 mabu ebete ebe waloma:tapi iyaiya tanalo epetapi iyatulamiti. Ebete ibi iyatulamelu negiya, “Godote Epono Naniwi kubakuba epono kotamo kiyatimene, ebene iba:te ebe kanakapuima:na:, wiyasiya ebete netewa-kapiya egelalo a:ene walo ka:kemaigamene.”

9:31 - Mak 8:31; 10:32-34

32 Wiyasiya Ya:sute degiya ebe waloma:tapiate ebe tabono magumu wadenomamo kemalagidilutiya:, ebema: iba:te me tanaloma: Ya:suko alateda:ma: na:toletoleutiya.

9:32 - Luk 9:45

Kawodawama: Potele Na:keda:mene

Ma:t 18:1-5; Luk 9:46-48

33 Ebene iba:te Kapeniyama duliynomolamo da:pelamiya, Ya:sute moto guamo nodolote ebe waloma:tapi ebo nalateda:liya, “Gabo tetelo la: beda: mabuma: kegelawitakama?”

34 Iba:te tabo kowaimiya: mabu iba:te ibino taneba magumulo potele kawoma: eda:ma: apaminateuitiya.

35 Ebe mabuma: Ya:sute okolite ebene 12 waloma:tapi ebetamo ka:la:mite iba:tamo negiya, “Kebe lumagite kawoma: eda:ma: ubi diyatimene, ebete ebe a:ka:tuwa: walogabodawama: midite epetapino wiya: wokodawama: neda:mene.”

9:35 - Luk 22:24; Ma:t 20:25-27; Mak 10:43-44

36 Ebene Ya:sute gudu da:peso lawete ibino tetenomamo adipite, ebe kotamo eba a:wiyamidalo iba:tamo negiya,

37 “Kebe lumagite naimano mailamo mako gudu da:peso kalakalago dowlubina ebete na walubinina, ega:walo kebe lumagite na dowlubinina ebete na kapiya kowalubinina:, ebete na Alibonedawa Godoko atumu na:kowalubina.”

9:37 - Ma:t 10:40

Ago Gowelaoa:dawa Ebe A Walubidawama: Eda:na

Luk 9:49-50

38 Ebene Yonete Ya:sutamo negiya, “Iyatulamedawa, ale kapiya dubu uima:, ebete a:imano mailamo kubakuba uliyana daliboliti, wiyasiya ale ebe kawiya anima: ebe tanalo katepama: mabu ebe aimano taneba lumagia:.”

39 Wiyasiya Ya:sute iba:tamo negiya, “La:le ebe ako-odiyobala:. Kebe lumagite naimano mailamo anoano tanalo dosiyodilomene, ebe lumagite tote naimano tanaloma: kuba tabo a:ka:nikiyawaomene, 40 mabu nanitabola, kebe lumagite ago gowelaoa:dawama: deda:na, ebete a walubina.

9:40 - Ma:t 12:30; Luk 11:23

41 Nale la:tamo nani tabo gemo, la:le na Kelisokono epoma: deda:wenama, ebe mabuma: idawate obo la:tamo dikalametamene, ebete Godogodone delaemene ebe wade wiyate akalatidimene.”

9:41 - Ma:t 10:42

Kuba Gabamo Wabuga:ta Tanalo

Ma:t 18:6-9; Luk 17:1-2

42 Ebene Ya:sute walo na:kegiya, “Da:peso gudute na nanitabokobi eba midininalo, kebe lumagite ebe kuba gabamo dowabuga:tana, modobola epate ebe lawete ebene kuwokoba:mo kawo nokolanomo ma:midaomete kewa: kolomamo neba:idiloma:na:, ebete atu kuba tanalo gudu iditamosi yodilokapoma:.

43 Ega:walo a:imano kotote a:ma: kuba gabamo dowabuga:tatana, notowamida! Modobola a:ma:le kapiya kotago Godokono Igilo Duliynomolamo nopegama:, modoboa: koto netewago Ela Opamo toma:. Nanitabola, ebe opolo elate uwomua: tetelo nowaena,

9:43 - Ma:t 5:30

44 ebolo a:elao epono ape denalenaka ebe ea:ga:te ka:elaona:, ega:walo elate ka:egana:.⁷

45 Ega:walo a:imano agowate a:ma: kuba gabamo dowabuga:tatana, notowamida! Modobola a:ma:le kapiya agowago Godokono Igilo Duliynomolamo nopegama:, modoboa: agowa netewago Godote a:ma: Ela Opamo neba:idiloma:.

46 Ebolo a:elao epono ape denalenaka ebe ea:ga:te ka:elaona:, ega:walo elate ka:egana:.

47 Ega:walo a:imano balidite a:ma: kuba gabamo dowabuga:tatana, nemagoba:! Modobola a:ma:le balidi kapiyago Godote Kawo Elawodawama: deda:na ebe duliynomolamo nopegama:, modoboa: balidi netewago Godote a:ma: Ela Opamo neba:idiloma:.

9:47 - *Ma:t 5:29*

48 Ebolo a:elao epono ape denalenaka ebe ea:ga:te ka:elaona:, ega:walo elate ka:egana:.”

9:48 - *Ais 66:24*

49 Ebene Ya:sute tabo idi ma kunu kegiya, “Epate solu baeamo keba kunu kalomonake, Godote epo bilibilinomono ilukuli tanalamo ebena ela eba kunu kapalomolaemene.

50 “Solu wadenomola, wiyasiya lumagi idino solu golate dalatidimene, a:ma:le walo solukobi midima: a:ka:modoboaemene. Ebema: Godokono solute la:imano taneba magumulo nitanamene, iyo, modobola idite idi nilakapoimilo eba kunu nilukuliniyala:.”⁸

9:50 - *Ma:t 5:13; Luk 14:34*

10

Kamiyale Alibuti Tanalo

Ma:t 19:1-12; Luk 16:18

1 Ebene Ya:sute Ga:lili opo atepate Yudiya opodo petote Yodane Kolomo apuamo gito nemaigiya. Ebe tetelo epo bilibilinomate ebetamo walo da:ka:pelamiya, ebena ebete ibi walo na:kiyatulamiya mabu ebena osiyodilo tanalo ma kunula.

2 Ebene Pa:lisi tanebapi epetapiate pelamete, Ya:suko kuba gabamo ka:powabuga:tama: ebe napalatediya, “Dubute ebena kamiyale dalibutimene, Godokono Totomu Tabo bakadikanalemene?”

3 Ya:sute wiyasiya iba:tamo negiya, “Mosesete la: beda: totomu tabo kanaletiyala?”

4 Iba:te negeliya, “Dubute ebena kamiyale alibutima: Mosesete gabo atamo ma kunu osiyodiliya, dubute ebena ubi diyatimene, ebete kamiyale alibuti pepa osiyodilote ebetamo gito kikaemene.”

10:4 - *Totomu 24:1-4; Ma:t 5:31*

5 Ebene Ya:sute iba:tamo negiya, “Mabu la:imano tepo magumu kodakodaibinomola, Mosesete kamiyale alibuti tabo Godokono Bukamo ebema: iyatiya.

6 Wiyasiya numa:la:, dopamo Godote me opo dosiyodiliya, ebe tetelo ebete dubula kamiyalela osiyodiloliya.

10:6 - *W Mabu 1:27; 5:2*

7 Me mabuma: dubute ebena nabiwila menokola miyapate ebena kamiyala:go kapiya bailo kokolioma:na:,

10:7-8 - *W Mabu 2:24; Epe 5:31-33*

8 ebena ibi netewapiate kapiyama: eda:te walo iyama: a:keda:ma:na:, iyo, ebe tetelo ibi kapiyanomola.

9 Numa:la:, Godote ibi netewapi kapiyakobi a:midiliya, ebema: lumagite ibi iyakobi midilima: modoboa:.”

10 Walone moto gulo Ya:suko waloma:tapiate ebe tabono magumuma: ebe danalatediya,

11 ebete iba:tamo ma kunu giya, “Kebe lumagite ebene kamiyale alibutite kamiyale idi daidimene, ebete Godokono ololo apulo ebe kamiyale pilolo kaidimene,

10:11 - Mat 5:32

12 ega:walo kebe kamiyaletu ebene dubu alibutite dubu idi delaemene, ebete ebe dubu atumu pilolo kelaemene.”

Ya:sute Guda:tamo Koto Dowatiolelamiya

Ma:t 19:13-15; Luk 18:15-17

13 Ebene epo epetapiate ibino gudi Ya:sutamo nemagataliya, ebete iba:tamo koto eba watiolelanelo Godoko kanama: ebete ibi wadenomamo kowalubilinama:. Wiyasiya ebe waloma:tapiate ebe epo kawiya analelo ibi dodiyoboliya,

14 Ya:sute ibino osiyodilo tanalo umite iba:tamo dowalo negiya, “Gudi natamo pelaema: modobola. Ako-odiyobola:la:, mabu mako epate Godote Kawo Elawodawama: deda:na ebe duliyoumolamo ka:nopilaoma:na:.

15 Na la:tamo nani tabo gemo, kebe lumagite gudu da:pesomu aimano Kawo Elawodawa Godoko lawea:no, ebe lumagite ebene Kalakala Duliyoumolamo a:ka:nopegamene.”

10:15 - Mat 18:3

16 Ebene Ya:sute guda:tamo koto eba watiolelanelo Godoko ebo aniya, ebete ibi wadenomamo kowalubilinama:.

Inamabu Bilibilinomago Dubute Ya:sutamo Da:piya

Ma:t 19:16-30; Luk 18:18-30

17 Ebene Ya:sute maigate gabodo eba tutalo, dubu idite ebetamo na:puligate pupamo nokolite ebe naniya, “Wade Iyatulamedawa, na beda: tanalo osiyodilote uwomua: igilo ebo na:kelaemo?”

18 Ya:sute ebetamo negiya, “A:ma:le na wadedawama: beda:ma: keka:na:miawa:? Wadedawa idi puliyala, Godoko kapiyate wadedawala.

19 A:ma: Godokono Totomu Tabo iyatawala. Lumagi akoanakapuma:la:, lumagi idino kamiyale pilolo akolawa:la:, inamabu pilolo akouwata:la:, lumagi idino tanaloma: a:da: tabo akokiyawala:, lumagino inamabu a:da: gabodo akouwata:la:, ega:walo a:imano menokola nabiwila ibino tabamo na:tuduwatanakiye.”

10:19 - Maimi 20:12-17; Totomu 5:16-20

20 Wiyasiya ebete Ya:sutamo negiya, “Iyatulamedawa, na da:peso tetene wagilimite me totomu bilibilinomo kodakodalo uwatete kapiya idi kadikanaliya:.”

21 Ebene Ya:sute ebe uminate nilakapoimilo ebe naniya, “Kapiya tanalote a:ma:godolo ka:modobona:. Modobola, a:ma: toawete, epetapiate a:imano inamabu bilibilinomo maniamo uwateometate, a:ma:le ebe mani nigologolopiatamo gito na:nikalamola:. Ebe tetelo a:ma: walo ka:pa:wete na nowaloma:eniye, ebene a:imano inamabu bilibilinomate Godokono Unu Duliyoumololo ka:nepola:nama:na:.”

22 Ebete ebe taboma: dopo mibonomoma: eda:te tepo mibago gito tiya, mabu ebe inamabu bilibilinomagodawanomola.

23 Ebema: Ya:sute ebe waloma:tapi ulamolelo nanaliya, “Godote Kawo Elawodawama: deda:na, inamabu bilibilinomagopiate ebe duliyoumolamo nopila:oma: kodakodanomola!”

24 Ebe tetelo ebe waloma:tapiate ebena taboma: nanoanoutiya, ebena Ya:sute iba:tamo walo na:kegiya, “Naimano ekakiala:, Godote Kawo Elawodawama: deda:na, epate ebe duliynomolamo nopila:oma: kodakodanomola!

25 Numa:la:, ka:molo-goeote⁹ kaliku waluono moe iyado nilupigama: kodakodama: eda:na, gaboa:nola. Atumu inamabu bilibilinomagodawate Godokono Kawo Elawodawano duliynomolamo nopegama: kodakodanomoma: eda:na, gabote nanitabonomolo a:kitanamene.”

26 Ebene iba:te kawonomamo la:wa:ote, ibi a:ka:tuwa: ibino taneba magumulo negelitya, “Ya:sute dege ebe tabote nanitaboma: deda:na, piyate modobola:ka: Godote ibino igilo mula:lalaema:?”

27 Ya:sute ibi ulamenate negiya, “Epate a:ka:tuwa: ibino igilo mula:lema: modoboa:, wiyasiya Godoko kapiyate modobola mabu ebegodolo elawo bitana iyaiya tanalo bilibilinomo osiyodilolema:.”

28 Ebene Pitate Ya:sutamo negiya, “A:ma: numa:, a inamabu bilibilinomo miyapate a:ma: nowaloma:enata.”

29 Ya:sute iba:tamo walo na:kegiya, “Na la:tamo nani tabo gemo, kebe lumagite ebena moto, o ebena nanila nanikubila ekakila, o ebena menokobila nabila gudila ega:walo ebena opo, ebete na mabuma: ega:walo Godokono Wade Tabo kiyawaoma: ebe tanalo da:miyapamene,

30 ebete me tetelo motola, nanila, nanikubila, ekakila, menokobila, gudila, ega:walo opo kawonomo walo ka:kuwatemene. Ega:walo atu tetelo epate temeteme tanalo ebetamo kikameoma:na:, wiyasiya walone nale ebetamo uwomua: igilo kikaemamo.

31 Iyo, nanitabola, ka:lo dopopi bilibilinomo da:pola:na, iba:te walone walogabopima: keda:oma:na:, ega:walo ka:lo walogabopi da:pola:na, iba:te walone dopopima: keda:oma:na:.”

10:31 - Mat 20:16; Luk 13:30

Ya:sute Ebena A:e Tanaloma: Walo Da:kegiya

Ma:t 20:17-19; Luk 18:31-34

32 Ebene Ya:sute ebe waloma:tapiago Yelusalema kawo duliynomolamo eba tolamitalo, ebete ibi dopolamete tuti. Ebe tetelo ebe waloma:tapiate woki bilibilinomoma: eda:utiya, ega:walo kebe epate ibino walogabo apune da:pelamitya iba:te atumu na:ka:toletoleutyia. Ebene Ya:sute ebena 12 waloma:tapi uwatete, ebetamo da:pemaima:na: ebe temeteme tanaloma: ibi eba iyatulamelo negiya, *10:32-34 - Mat 8:31; 9:31*

33 “La: nolowiala:. A Yelusalemano tolamitama:. Ebola Godote Epono Naniwi epatamo kikalaemene, ebena Godotamo kalimagono ikameopino watowatopi ega:walo Godokono Totomu iyatulamepi, iba:te ebe anakapuima: gelate Yua:piatamo ebo kikalaema:na:.

34 Ebene ebe epate ebe kalakalatete, ebetamo kowe meote, pa:ka:pa:ka:mo ebe a:na:ma:ga:midaote kanakapuima:na:, wiyasiya ebete netewa-kapiya egelalo a:ene walo ka:kemaigamene.”

Ya:imesiko Ega:walo Yoneko Iba:te Kuba Wokiamo Ya:suko Tanalo Idima: Daniya

Ma:t 20:22-28

35 Ebene Sebedikono gudi Ya:imesiko ega:walo Yoneko iba:te pete Ya:sutamo na:pegeliya, “Iyatulamedawa, a ubila ale a:ma: beda: tanaloma: danatamene, nikaemiye.”

36 Ya:sute ibi nanaliya, “La: beda: tanalo ubila:ka: nale la:tamo ikalaema:?”

37 Iba:te tabo eba wiyalo negeliya, “A:ma:le Kawo Elawodubuma: deda:emene, a ubila a:ma:le degeaemene idawate a:imano tumudi apulo ega:walo idawate pele apulo a:imano kawo alonomo magumulo kilukulitama:.”

38 Wiyasiya Ya:sute iba:tamo negiya, “La:le na wade wokiamo kanana:wita: La: modobola:ka: nale da:nimo ebe temeteme kalila:mo nioma:? La: modobola:ka: Godote na a:e tanalamo daduba:midanemene ebe tanalamo la: waduba:midaolema:?”

10:38 - Mak 14:36; Luk 12:50

39 Iba:te negeliya, “A modobola.”

Ya:sute iba:tamo negiya, “Me tanalo nanitabola, nale da:nimo walone tetelo la: atumu ebe kalila:mo niawete temeteme bolowionakomata, ega:walo Godote na daduba:midanemene ebe a:e tanalamo la: kaduba:midaolema:ta.

10:39 - Ali 12:2; Awo 1:9

40 Wiyasiya naimano tumudi apuamo ega:walo pele apuamo ilukuli tanaloma: nale a:kegemo. Godote piyatamo dosiyodilolelamiya ibinomate ebolo ka:pola:nama:na:, iyo, me tanaloma: ebete a:ka:tuwa: kegemene.”

41 Ebene Ya:suko waloma:tapi teni epetapiate ebe tanalo olowite, Ya:imesiko ega:walo Yoneko iba:tamo na:dowautiya,

42 wiyasiya Ya:sute ibi bilibilinomo ebetamo ka:la:mite ibi nanaliya, “La: iyatawalata, Godoko nanitabokobi midia:pino kawokawo dubate ibi a:ka:tuwa: ibi eba wadipalatelelo epo epetapi elawamo analenaka, iba:te ibino ubi tanalamo ka:tudila:onama:.

10:42 - Luk 22:25-26

43 Wiyasiya la: ebako epoma: a:keda:oaema. Kebe lumagite la:imano kawodawama: eda:ma: ubi diyatimene, ebete la:imano wiya: wokodawama: neda:mene,

10:43 - Mat 23:11; Mak 9:35

44 ega:walo kebe lumagite dopodawama: eda:ma: ubi diyatimene, ebete la: bilibilinomono idoko motono wokodawama: neda:mene, iyo, ebe a:ka:tuwa: ebe oponomamo iyatinomo niyatimene.

45 Numa:la:, Epono Naniwite da:piya, ebe ubia:nola me opo epate ebetamo wiya: wokopima: eda:oma:, wiyasiya ebete na:piya epatamo wiya: wokodawama: ka:peda:ma:, ega:walo ebena igilo iyabaiamo iyatite ebena a:e wiyate epo bilibilinomo epetapi Saitanakono idoko motone gito kowagailima:.”

Ya:sute Batimiyasikono Balidi Wadekobi Da:midilimiya

Ma:t 20:29-34; Luk 18:35-43

46 Ebe tetelo Ya:sute ebe waloma:tapiago Yeliko kawo duliynomolamo pelamete, ebena iba:te epo bilibilinomo epetapiago kapimiya ebe duliynomolone pemaimite eba tolamelolo, Timiyasikono gudu Batimiyasiko balidi tamio dubula, ebete gabo niyakabolo eba okulitalo epo epetapi manima: ebo toweolamiti.

47 Ebene ebete Nasalete duliynomolodawa Ya:sukono pe tanalo olowite kawonomamo negiya, “Ya:su, Da:ibidikono A:la:mu! A:ma:le na na:nilakapoinama:!”

48 Ebe tetelo epo epetapi bilibilinomate ebe kawiyana analo nodiyobiya ebete taboa:no kokolitama:, wiyasiya ebete kawonomamo walo na:kegiya, “Da:ibidikono A:la:mu! A:ma:le na na:nilakapoinama:!”

49 Ebene Ya:sute ebamo utite negiya, “La: ebe mamona neka:miala:.”

Ebene iba:te ebe balidi tamio dubu eba ka:milo ebetamo negeliya, “Nekalakala, ebete a:ma: ka:mitata! Nemaiga!”

50 Ebe tetelo ebete ebenu lubudino kaliku iyabaiamo ba:idilote, samonomamo maigate Ya:sutamo ebo piya.

51 Ebene Ya:sute ebe nalatediya, “A:ma: beda: ubi kiyata:wita nale a:ma:tamo kosiyodiloma:?” Balidi tamio dubute negiya, “Iyatulamedawa, na ubila inamabu wadenomamo kulamolema:.”

52 Ya:sute ebe naniya, “A:ma: na:toa. A:imano nanitabokobi midi tanalote a:ma: wadekobi a:mida:ta,” ebema: nanitabola, ebe tetenomolo ebenu balidite wadekobi dolowiomiya, ebete ebe to gabodo Ya:suko ebo waloma:tiya.

10:52 - Mak 5:34

11

Ya:sute Yelusalema Kawo Duliyomolamo Da:nopegiya

Ma:t 21:1-11; Luk 19:28-40; Yon 12:12-19

1 Ebene iba:te Yelusalema kawo duliyomolo niyakabamo eba pelamelo, Betapa:gi duliyomolo ega:walo Betani duliyomolo tatalido tolamete Olibi Kewakewa Unu Damelamo ebo nemaimiya. Ebe tetelo Ya:sute ebe waloma:tapi netewa dopamo eba alibolelo

2 ibi nanaliya, “La: ebe niyakabo duliyomolamo toawete, ebe duliyomolamo eba nemaimilo donoki-goeo da:peso ala:mo ma:midao ka:numa:digamamota, lumagite dopamo ebe unamo kokoliya:. Modobola la:le ale pamiaiwete nemagaiyala:.”

3 Idawate la:tamo degemene, ‘La: me tanalo beda:ma: kosiyodilawitama?’ la: wiyasiya ma kunu negeliyala:, ‘Kawodawate donoki-goeo ubila, ebete walo samonomamo kakapalibomene.’ ”

4 Ebene iba:te tote, gabolo donoki-goeo da:peso gigiyu niyakabolo ma:midao numite ale ebo nepamiya.

5 Ebema: piyate ebolo da:pola:niya iba:te ibi nalateda:liya, “La: ale beda: mabuma: kepamiawitama?”

6 Ebene Ya:sute ibi netewapiatamo dopamo kebe tabo kegiyale, iba:te ebe atu tabo ibi danaliya ebe epate ibi gito miyapiya.

7 Ebene iba:te ebe donoki-goeo da:peso Ya:sutamo magaete, ibino watubino kaliku donoki-goeo unamo alomomete, Ya:sute ebe kaliku unamo ebo okoliya.

8 Ebe tetelo epo epetapi bilibilinomate ibino ga:ga:ga:ga: kaliku pupukulamete gabamo apoago tolamiya, ega:walo epetapiate gabo tametamene puwala otolete gabamo atumu kapotameonatiya.

9 Ebene piyate da:dopiya ega:walo Ya:sukono walogabo apune da:pelamitiya, ibi bilibilinomate kawonomamo negelitiya,

“Godoko nadipata:la:!”

Godoo, a:imano mailago da:pita,

modobola a:ma: ebe lumagi kawokobi na:midiye!

11:9 - Oale 118:25-26

10 Iyo, aimano ewono nabiwi Da:ibidikono a:la:mute Kawo Elawodubuma: deda:na, modobola a:ma:le ebe kawokobi na:midiye!

O epala:, la: Godoko moiolo unamo nadipata:la:!”

11 Ebe tetelo Ya:sute Yelusalema kawo duliyoumolamo nopegate, Godoko Amamateno Iya Motamo nodolote inamabu bilibilinomo ulamola:go ebo petiya, ebene dadimoni ebete Betani duliyoumolamo walo na:ka:toni ebene 12 waloma:tapiago.

Ya:sute Da:imi Noloa: Umei Kewa¹⁰ Dumiya

Ma:t 21:18-19

12 Egela idilo iba:te Betanine walo da:ka:pelamitiya, gabo tetelo Ya:suko bae kape tanalo eba piyatawalo,

13 ebete umei kewa paagono muluamo pumite, da:imi olema: ebamo gito tiya. Wiyasiya ebete ebamo da:nemaigiya paanomoiya nulamiya, mabu ebe tete umei da:imi kewano nolo tetea;,

11:13 - Luk 13:6

14 ebema: ebete ebe umei kewatamo negiya, “Uwomua: tetelo epate a:ma:godone da:imi a:kenaonakoma:na!”

Ebe tabo ebe waloma:tapiate olowiya.

Ya:sute Godoko Amamateno Iya Moto Wadekobi Da:midia

Ma:t 21:12-17; Luk 19:45-48; Yon 2:13-22

15 Ebene iba:te Yelusalemamo nemaimite Godoko Amamateno Iya Motamo tolamete, ebe motolo Ya:sute inamabu olowamepi nulamete iyabaiamo elawonomamo na:na:ma:lateliya, ega:walo ebete mani odowaolepino patapata bigo olowamepino ilukuli patapatago ebo noba:midaolelamiya.

16 Ega:walo Yelusalema duliyoumolo epate ibino inamabu apune apune dowadaenakiya, iba:te ebe inamabuago Godokono Motono kala magumudo podolote apudo da:nemaimionakiya, Ya:sute ibi ebe mabuma: odiyoboliya.

17 Ebe tetelo ebete epo eba iyatulamelo negiya, “Nanitabola, Godokono Bukalo tabo ma kunu bitana, ‘Naimano Moto iyaiya opo bilibilinomono epate Godoko Amamate Motoma: kegelama:na;, la:le wiyasiya pilo epono motoma: a:midimata!’ ”

11:17 - Ais 56:7; Yel 7:11

18 Ebene Godotamo kalimagono ikameopino watowatopi ega:walo Godokono Totomu iyatulamepi, iba:te ebe tabo olowite Ya:suko anakapuima: gabo waditiya, wiyasiya iba:te ebe na:tolemiitiya mabu epo bilibilinomate ebene iyatulame tanaloma: anoanolo nekalakalautiya.

11:18 - Mak 14:1

19 Ebene dadimoni Ya:suko ega:walo ebe waloma:tapi ebe kawo duliyoumolone walo na:ka:tolameniya.

Ya:suko Waloma:tapiate Umei Kewa Alawoma: Eda: Dumiya

Ma:t 21:20-22

20 Egela idi duiyanomolo iba:te kawo duliyoumolamo walo eba ka:pelamitalo, umei kewa dolodolone wagilimite apa:mo pemaiga alawoma: eda: ebo pumiya.

21 Ebene Ya:sute dopamo beda: tanalo kosiyodiliyale, Pitate ebe tanalo malagidilote Ya:sutamono negiya, “Iyatulamedawa, numa:! A:ma:le kawiyi danawia ebe umei kewate alawoma: edi!”

22 Ya:sute wiyasiya iba:tamo negiya, “La: Godoko nanitabokobi na:mida:la:.

23 Na la:tamo nani tabo gemo, kebe lumagite nanitabokobi midilo me damelamo ma kunu degemene,

‘A:ma: kewa: kolomamo na:toatepa!’ ebene ebete tepo magumulo woki netewama: eda:no, ebe tanalote pemaigama: nanitabokobi da:midimene, ebete ebe tanalo nanitabolo kuimene.

11:23 - Mat 17:20

24 Ebema: nale la: nanalemata, la: beda: tanaloma: Godoko da:toweoma:ema, la: ebe tanalo iyalo laema: gelalo nanitabokobi na:midiyala:, ebene la: ebe tanalo nanitabolo kelaemamota.

11:24 - Mat 7:7

25 Ega:walo kebe tetelo la:le maimiawete Godotamo towetowe tabo degelaema, ebene lumagi iditamo dowan tanalote ditanamene, la: ebe lumagino kuba egebolema:wete na:dodolomatilimiyala:, ebene la:imano Unu Duliyomolono Nabiwite la:imano kuba egebolelametate atumu ka:ka:dodolomatililaema:ta.

11:25 - Mat 6:14-15

26 Wiyasiya la: epono kuba egebolelama:wete dodolomatililamea:no, la:imano Unu Duliyomolono Nabiwite la:imano kuba egebolelametate a:ka:dodolomatililametamene.”&#b9;¹

Yu Watowatopiate Ya:sukono Elawo Mabuma: Ebe Dalatediya

Mat 21:23-27; Luk 20:1-8

27 Ebe tetelo Ya:suko ega:walo ebe waloma:tapi Yelusalema kawo duliyomolamo walo na:ka:pelamiya. Ebene Ya:sute Godoko Amamateno Iya Motolo eba nepata:lo, Godotamo kalimagono ikameopino watowatopi, Godokono Totomu iyatulamepi, ega:walo kawokawo dubu epetapi, iba:te ebetamo pelamete

28 ebe ma kunu palatediya, “A:ma: me iyaiya tanalo pokono elawamo kosiyodilola:wena? Ega:walo me elawo potele kikametia, a:ma:le me tanalo kosiyodilola:wenama:?”

29 Wiyasiya Ya:sute iba:tamo negiya, “Nale kapiya tanaloma: la: kalateda:lemamota. La:le na wiya tabo wadenomamo dowaminama:ema, ebene nale me tanalo pokono elawamo kosiyodilolenamo, ebe tanalo nale la: ebo kanalemamota.

30 Naimano alateda: tabo ma kunu bitana la:tamo, Yonete epo obamo dowaduba:midaolenaki, ebe elawo ebetamo potele kikamile, Godotela:ka: o lumagitela:ka:?”

31 Ebema: ibi a:ka:tuwa: ibino taneba magumulo apamineuilo negeliya, “Ale degelama: Godote Yonetamo elawo ikami, ebete kegemene, ‘Mabu keleka: la:le ebena tabo nanitabokobi ka:mida:wea:?’

32 ega:walo a modoboa: ebe ma kunu anama:, me opo lumagite Yonetamo elawo ikami.” Iba:te epono dowan tanaloma: toletoleolo tabo ma kunu geliya, mabu ibi iyatawala epo bilibilinomate Yoneko Godokono nanitabo woki awokalimidawama: gelana.

33 Ebema: iba:te ibino tepo magumuno woki waminaolelo Ya:sutamo negeliya, “Yonekono elawo mabu a iyatawa:.”

Ebe tetelo Ya:sute iba:tamo negiya, “Ebema: nale la: atumu akanaletama nale me iyaiya tanalo pokono elawamo kosiyodilolenamo.”

12

Tupina Da:imi Pali Atila:pino Iyatulame Oi

Mat 21:33-46; Luk 20:9-19

1 Ebene Ya:sute oi tabo ida:mo ibi ma kunu iyatulamiya, “Dubute pali osiyodilote tupina da:imi kewa bilibilinomo ebo ami, ebe da:imino mailo ebe gala:ipi da:imila. Ebene amio tanalote dolopoligi, ebete

kala ga:dimite, da:imi ii egedioleno nokola bobo obobote, pali atila:pino unu nupunupu ebo eti. Ebe tetelo ebe dubute ebene pali atila:pi dubu epetapiatamo gito atepi, iba:te ebolo woko eba osiyodilonalo, ebe pali wadenomamo umilo ebene da:imi kuwatolemenakoma:, ebene ebete mulu oponomamo gito ti.

12:1 - Ais 5:1-2

2 “Ebene da:imi tapio tete da:pi ebete pali atila:piatamo wiya: wokodawa napalibi, ebete iba:godone da:imino mani magumune ebene kawodawano apu ka:pelaema:,

3 wiyasiya iba:te ebe lawete gaubamo anagalimiote inamabua:no gito nalibiya.

4 Ebene pali namutudawate wiya: wokodawa idi walo dakapalibi, wiyasiya iba:te ebe watolo eba anagalimiolo ebe ilipo ikamete atumu gito kalibiya.

5 Ebene ebete wiya: wokodawa idi walo dakapalibi iba:te ebe anakapumiya. Ebene wiya: wokopi bilibilinomo epetapiate da:pelamiya, iba:te atumu epetapi anagilamoletete gito aliboliya, wiyasiya iba:te epetapi anakapulamolliya.

6 “Ebene namutudawagodolo kapiya idi dokolinami, ebe gudu ebete kawonomamo malagidilonami.

Ebema: walogabonomone ebete ebe gudu eba palibolo ebene wokilo negi, ‘Nanitabola, iba:te naimano gudutamo ka:tudila:oma:na.’

7 “Ebe pali atila:pi dubate wiyasiya ibino taneba magumulo negeliya, ‘Numa:la:, me gudute nabiwino inamabu namutudawama: deda:mene, ebe gudute na:pe. Ebema: modobola ale ebe anakapumite ebene pali lawenomo kelaemalema;,’

8 ebene iba:te ebe lawete anakapumite palino kala magumune gito neba:idiliya.”

12:8 - Yu Epo 13:12

9 Ebema: Ya:sute olowiopiatamo negiya, “La:imano woki keba kunula:ka:, pali namutudawate beda: tanalo na:kosiyodilomene? Nanitabola, ebete pete pali atila:pi panakapulamete ebene pali epetapiatamo ka:pikalaemene.

10 Iyo, la: dopamo Godokono Bukalo me tabo nanitabolo eka:la:mioliamata,

‘Moto etepiate iyabaiamo diyatiya,

ebe alote wiyasiya motono elawo mabuma: eda:na.

12:10 - Oale 118:22-23

11 Me tanalo Godote osiyodili,

ebema: aimano wokilo nanoanoutama:!’ ”

12 Ebema: Yu watowatopi dubate Ya:suko laema: ubila mabu ibi iyatawala ebete me iyatulame oi ibino tanaloma: kiyawaiya, wiyasiya iba:te epo tolelamelo ebe atepate gito tolamiya.

Loma Epono Kawo Elawodubunomo Sisatamo¹² Ta:kese Mani Ikameo Tanalo

Ma:t 22:15-22; Luk 20:20-26

13 Ebene Yu watowatopiate Pa:lisi tanebapi epetapi ega:walo Kawo Elawodubu Elodikono tanebapi Ya:sutamo aliboliya, iba:te ebe kuba gabamo eba nowabuga:talo ebete kebako tabo gelo ebe ebo kelaema:.

12:13 - Mak 3:6

14 Iba:te ebetamo pelamete a:da: elemasigi gabodo na:pegeliya, “Iyatulamedawa, a iyatawala a:ma: nani tabo lumagilata. A:ma: epetapino gito gela tanalomo ka:tuduatawenakoa:, ega:walo a:ma: epo

unu nikapiamo kulama:wena:, ma kunu lumagi idi atepalo lumagi idi ebo a:kelawa:emene. Iyo, a:ma: epo Godokono gabo wadenomamo iyatulamenata, ebema: a nanaa:, Loma epono Kawo Elawodubunomo Sisatamo ta:kese mani ikameoma: modobola:ka: o kubala:ka:? A ebetamo ba:kikameoma: o a:kikameoma:?”

15 Wiyasiya Ya:sute ibino mena netewa tanalo iyatawate iba:tamo negiya, “Mabu keleka: la:le na masiginima: dowagela:witama? La: mani kapiya natamo nikanama:la:, na kuimamo.”

16 Ebene iba:te kapiya mani ebetamo dikamiya, ebete ibi nalateda:liya, “Me mani unulo da:pola:na, mailo ega:walo ololo pokonola:ka:?”
Iba:te negeliya, “Kawo Elawodubunomo Sisakonola.”

17 Ebene Ya:sute iba:tamo negiya, “Sisakono inamabu Sisatamo nikameala:, wiyasiya Godokono inamabu Godotamo nikameala:.”
Ebema: iba:te ebenu taboma: kawonomamo anoanoutiya.

12:17 - Lom 13:7

A:e Magumune Igilamo Maimio Tanalo

Ma:t 22:23-33; Luk 20:27-40

18 A:e magumune maimioa:noma: degelana, ebe epo Sa:diyusi taneba epola.¹³ Ibi epetapiate Ya:sutamo pelamete tabo ma kunu pegeliya,

12:18 - Ali 23:8

19 “Iyatulamedawa, Godokono Bukamo Mosesete tabo ma kunu akuloliya, ‘Dubute a:ete kamiyalet gudia:no datepamene, ebenu ekawite ebe amole lawete ebenu naniwino tanaloma: gudi nosiyodilolemene.’

12:19 - Totomu 25:5

20 Kapiya dubuno sebeni koiate ilukulinamiya. Ibi magumulo dopo gudute kamiyalet lawete gudi ulamea:no a:iya,

21 ebenu ebenu ekawite atu kamiyalet kelawete gudi ulamea:no gito ka:iya, ega:walo tetedawa idite atumu kowageliya.

22 Ebene ebe sebeni atu alailama:te gudia:no eba kunu a:elaiya, wiyasiya kamiyalet walone gito a:iya.

23 Ebema: iba:te a:e magumune igilamo demaimioma:na:, ebe Kawo Egelalo ebe kamiyalet pokono kamiyalet: na:keda:mene, mabu ebe sebeni dubate aida:tepaiya?”

24 Ebene Ya:sute iba:tamo negiya, “Mabu la: Godokono Buka tabo ega:walo ebenu elawo iyatawa:, ebe mabuma: la:imano wokilo epono a:ela tanaloma: kubanu gelanakomata.

25 Numa:la:, epate a:e magumune igilamo demaimioma:na:, ebe tetelo iba:te kamiyalet walo a:ka:piaidiolema:na: ega:walo dubu a:ka:puwatolema:na:, wiyasiya iba:te Godokono Unu Duliomolono nopopimu bilukulionama:na:.

26 Ebe mabuma: Godokono Bukate a niyatua:mena a:elaopiate a:e magumune maimioma:na:. Iyo, Mosesete diyatiya ebe tabo la: nanitabolo eka:la:mioliamata, ma kunu elate kewalo dowaiti wiyasiya kewate kolotolitiya:, ebe tetelo Godote Mosesetamo negiya, ‘Nanitabola, na Godotela. A:ibalayamako, Aisa:keko, ega:walo Ya:ikoboko iba:te uwomua: tetelo poko kamamatene, na ebetela.’

12:26 - Maimi 3:2,6

27 Ebema: la: Sa:diyusi tanebapi la:imano wokilo na:kemalagidilawenama ebe ewonino igilate olopoligoiya? Ao, kolopoligiya:, mabu a:elaopiate Godoko kamamatena: wiyasiya piyate igilolo dilukulina ebe eponomate ebe amamatena. Me mabuma: la: Sa:diyusi tanebapiate epono a:ela

tanaloma: kubanu gelanakomata!”

Kebe Totomu Tabote Kawonomoma: Keda:nale

Ma:t 22:34-40; Luk 10:25-28

28 Ebene Godokono Totomu iyatulamedawa idite pete, iba:te degelitiya ebe tabo ebo polowiya. Ya:sute Sa:diyusi tanebapiatamo tabo wadenomamo da:kiyawaiya, ebe tanalo umite ebete Ya:suko nalatediya, “Kebe totomu tabote kawonomoma: keda:nale?”

12:28 - Luk 10:25-28

29 Ya:sute negiya, “Me kawo totomunomola. ‘Isalaela epala; la: nolowiala! Godoko aimano Kawodawala, ebe kapiyanomola, idi puliyala.

12:29 - Totomu 6:4-5

30 A:ma: a:imano Kawodawa Godoko nilakapolo nemalagidilona, a:imano tepo magumunomamo ega:walo a:imano uliyanano elawamo, a:imano woki kawonomamo ega:walo a:imano elawo kawonomamo.’

31 Ega:walo me kawo totomunomo idila. ‘A:ma: a:ka:tuwa: a:ma: demalagidilawena, modobola a:ma:le eba kunu a:ma: niyakabolo dokolina ebe lumagi nilakapolo nemalagidilona.’ Totomu tabo idite me totomu netewa a:kodoilimene.”

12:31 - Kalima 19:18

32 Godokono Totomu iyatulamedawate Ya:sutamo negiya, “Iyatulamedawa, nanitabola, a:ma: wadenomamo geata. Aimano Kawodawa Godoko kapiyanomola, idawa puliyala, kokolina:.

33 Lumagite ebene tepo magumunomamo ega:walo ebene uliyanano elawamo, ebene woki kawonomamo ega:walo ebene elawo kawonomamo ebete Godoko nilakapolo nemalagidilonamene. Ega:walo ebe a:ka:tuwa: ebe demalagidilona, ebete eba kunu ebe niyakabolo dilukulina ebe epo nilakapolo nemalagidilonamene. Nanitabola, me netewa totomu e kawokawonomoma: eda:ona, wiyasiya Godotamo ikameo tanalate kawokawoma: keda:ona:, iyo, epate elamo madolame sipi-goeogeo ega:walo nilakapo inamabu epetapi Godotamo dikameonaka, ebete negena ebe tanalo bilibilinomate kawokawoma: keda:ona:.”

12:33 - Totomu 4:35; 1Sa:m 15:22; Ose 6:6

34 Ebete tabo wadenomamo degiya, Ya:sute olowite ebetamo negiya, “Godote Kawo Elawodawama: deda:na, ebe duliyaomolamo a:ma: opegama: tatalila.”

Nanitabola, ebe tetene wagilimite epate Ya:suko tanalo idima: alateda:ma: na:toletoleutiya.

Godokono Alibodawa Kelisoko Potelela:ka:

Ma:t 22:41-46; Luk 20:41-44

35 Ebene Ya:sute Godoko Amamateno Iya Motolo epo eba iyatulamitalo negiya, “Godokono Totomu iyatulamepiate negelana Godokono Alibodawa Kelisoko ebe Da:ibidikono a:la:mula, ebene walone gudi magumune kawokalamene. Wiyasiya me tanalono magumu keba kunula:ka:?”

36 Numa:la:, Da:ibidite Godokono Uliyanano elawamo tabo ma kunu kiyawaiya,

‘Kawodawa Godote naimano Kawodawa Kelisotamo nege,

‘A:ma: naimano tumudi apuamo na:pokoliya,

ebene a:ma:go gowelaopi

a:ma:le naimano elawamo ibi ka:mikitaolema:ta.’ ’ ”

12:36 - Oale 110:1

37 Ebene Ya:sute tabo moga:melo walo na:kegiya, “La: me tabo eba malagidilolo na nanana:la:, Da:ibidite ebene a:la:mu Kelisoko ebene Kawodawama: ka:milo ebete Godokono tumudi apuamo okolima: giya, ebema: ebe tanalote keba kunu na:ka:pemaigamene?”
Nanitabola, ebe tetelo epo bilibilinomate Ya:sukono tabo kalakalago olowitiya.

Ya:sute Godokono Totomu Iyatulamepino Amama Tanaloma: Degiya

Ma:t 23:1-7,28; Luk 11:37-54; 20:45-47

38 Ebene Ya:sute epo eba iyatulamitalo negiya, “La:le Godokono Totomu iyatulamepi wadenomamo nulama:la:. Ibi ubila ga:ga:ga:ga: kaliku pupuliotte olowame bailo eba wapata:lamelo, epate ibi ebo kowalogolema:.

39 Ibi ubila a Yu epono balidi ibilamole moto gulo kawokawo dubuno ilukuli bailo kilukulima:, ega:walo ibi ubila soliyomu osiyodilo tetelo kawokawo ilukuli bailo ka:pola:nama:.

40 Ega:walo iba:te amoleamoleno inamabu elemasigi tanalado eba uwatelo, ebo opoliyaolelamanaka, ebene iba:te ebe kuba kuba:noma: gelalo tolamete Godotamo balidi eba nibilamolelo geyageya towetowe tabo ebo negelanaka, mabu ibi ubila epate ibino tanalo umilo ibi wadewadepima: kegelama:.
Ebe mabuma:, nanitabola, iba:te kuba wiya kawonomo kelaema:na:!”

Amole Kamiyalette Godotamo Mani Dikamiya

Luk 21:1-4

41 Ebene Godoko Amamateno Iya Motolo epate mani eba alomutalo, Ya:sute ebe mani alomo bai niyakabolo okolite epono mani alomo tanalo ulamiti. Inamabu dogodogopi epetapiate mani kawokawonomo alomutiya,

42 ebene inamabua: amole kamiyale idite pete netewa mani egege, kapiya toea keba kunula:ka: eba kunula, ebete ebo palomiya.

43 Ya:sute ebe waloma:tapi ebetamo ka:la:mite negiya, “Na la:tamo nani tabo gemo, epate mani dupaloma, me inamabua: amole kamiyalette ibi bilibilinomo odoili,

12:43 - 2Kol 8:12

44 mabu inamabu dogodogopiate ibino inamabu epetapi da:lulilamenako ebe inamabu paloma, wiyasiya me amole kamiyale inamabua:nola. Ebete ebene uwomu mani alomonomo apalomo, ebene bae uwateono manila.”

13

Godoko Amamateno Iya Moto Kubaimi Tanalo

Ma:t 24:1-2; Luk 21:5-6

1 Ebene Ya:sute Godoko Amamateno Iya Motone eba piwisigitalo, ebene waloma:tapi magumulo idawate negiya, “Iyatulamedawa, a:ma: nulama:.. Me nokola moto iyaiyanomola ega:walo wadewadenonomola!”

2 Ya:sute wiyasiya ebetamo negiya, “A:ma: me kawokawo moto ba:kulama:wita? Me iyaiya motono tanaloma: nokola idite nokola idi unulo a:ka:pola:nama:na:, mabu gowelaopiate nokola bilibilinomo mapitaolete opamo iyalekenomo ka:piyalekema:na:.”

13:2 - Luk 19:44

Kawokawo Temetema:te Pelaema: Ya:sute Degiya

Ma:t 24:3-14; Luk 21:7-19

3 Ebene Ya:sute Olibi Kewakewa Unu Damelalo eba okolitalo, Godoko Amamateno Iya Moto apuamo umilo okoliti. Ebe tetelo Pitako, Ya:imesiko, Yoneko, ega:walo A:nduluko, ibinomate ebetamo tolamete na:negeliya,

4 “A:ma:le a nanaa:, Godokono Moto kubaimi tanalote kebe tetelo na:ka:pemaigamene? A beda: anoano tanalote na:kiyatuaemene, tete na:pe me tanalo bilibilinomate ka:pemaimioma:?”

5 Ebene Ya:sute iba:tamo negiya, “La: nanisiwale. Lumagi idite la: demasigilitamene, la: ebenu tabo ako-olowiala;

6 mabu dubu bilibilinomo epetapiate naimano mailamo pelamete ka:pegelama:na:, ‘Na Kelisotela!’ ebene iba:te epo bilibilinomo ma kunu eba pemasigiolelo iya gabamo ebo kemagatalema:na:.

7 Ega:walo la:le iyaiya opo epono gowelao tanalo ega:walo ibino gowelaoma: nopo iyati tanalo dolowiaema, la: ebe mabuma: akotoletoleala:. Me tanalate nanitabolo ka:pemaimioma:na:, wiyasiya ebe tete ebe uwomu tetea:.

8 Nanitabola, opo epetapino epate opo epetapino epago ka:gowelaoma:na:, iyo, opo idite opo iditamogowela tanalo kosiyodilomene, ebene mumulate iyaiya opo bilibilinomamo ka:pelaema:na:, ega:walo iyaiya duliwomolo epetapilo epate baea:no kilukulioma:na:. Numa:la:, kamiyalete gudu laema: temeteme dowagilimi, me tanalo eba kunula.

9 “Ebema: la: la:imano tanalo wadenomamo nulamenala:, mabu kubakubapiate la: elawamo uwatetate tabo anagiyamida baiamo kemagatalema:ta, ega:walo iba:te Yu epono balidi ibilamole moto gulo la: gaubamo kalukolema:ta. Iba:te na mabuma: la:imano tanalo danagilamelelametamene, ebe tetelo la: iyaiya kawokawo elawodubuno ololo apulo utitatawete naimano Wade Tabo iba:tamo ebo ka:kiyawaomamota.

13:9 - Ma:t 10:17-20

10 Iyo, uwomu tete pea:no, Godoko ubila la:le dopamo ebenu Wade Tabo iyaiya opo bilibilinomolo ka:na:kiyawaema:.

11 Ebema: epate tabo anagiyamida baiamo la: demagataletamene, ebe tetete pemaiga:no la:imano gela tanaloma: woki bilibilima: akoeda:oala:, ma kunu, ‘Na beda: tabo na:kegemo?’ Tete da:pemene Godote kebe iyaiya tabono tanalamo la: dowlubilitamene, modobola la:le ebe tabo kapiya na:kiyawaiyala:, mabu nanitabola, la: a:ka:tuwa: a:ka:kiyawaoaema, Godokono Uliyanate la:do ka:kiyawaomene.

13:11 - Luk 12:11-12

12 “Ebe tetelo naniwite ekawi a:eamo kalibomene, ega:walo atu gabodo ekawite naniwi kanakapuimene, iyo, dubute ebenu gudu atumu kakamitimene, ega:walo guda:te dowate ibino menokobila nabila a:eamo kalibolema:na:.

13:12 - Ma:t 10:21

13 Ebene na mabuma: epo bilibilinomate la:tamo ka:dowaoma:na:, wiyasiya kebe lumagite kodakodalo utite uwomuamo da:nemaigamene, Godote ebenu igilo ka:mula:emene.”

13:13 - Ma:t 10:22; Yon 15:21

Talena Bai Kubaimidawano Tanalo

Ma:t 24:15-28; Luk 21:20-24

14 Na Makate me buka ka:la:mioledawatamo negemo, a:ma: me tabo Ya:sute degiya wadenomamo niyatawa.

Ya:sute tabo moga:melo walo na:kegiya, “Godokono Moto kubaimidawate ebe talena bailo utitalo la:le ebe duma:ema, ebe tetelo modobola Yudiya opo epate unuunu damelamo nalautioma:na:.

13:14 - Dan 9:27; 11:31; 12:11

15 Iyo, moto tanatimilo dokolitamene, ebe lumagite moto guamo walo a:ka:nopegamene ebenu inamabu uwatema:,

13:15 - Luk 17:31

16 ega:walo tumulo woko dosiyodilutamene, ebe lumagite walo motamo a:ka:toamene ebenu lubudino kaliku laema:.

17 “Numa:la:, lamitulamitu ega:walo nono dikalamena ebe kamiyala:tamo ebe egelate kubanomoma: keda:mene!

13:17 - Luk 23:29

18 Ebema: modobola la: Godoko na:toweomiyala: me tanalate gibagiba tetelo akopemaimiala:, 19 mabu ebe tetelo kawokawo temetemenomate ka:pemaimioma:na:. Numa:la:, Godote me opo dosiyodiliya ebe tetene wagilimite ka:lo me teta:mo pemaiga, ebakobako temetema:te dopamo ka:pemaimiya:, ega:walo walone tetelo ebakobako temetema:te walo a:ka:pelaema:na:, kapiya tetenomamo ka:pemaimioma:na:.

13:19 - Dan 12:1; Awo 7:14

20 Me tanalo nanitabola, Kawodawa Godote ebe tete gopowaimia:no lumagi idite me opolo igilolo a:kokolinamene, wiyasiya ebete kebe epo ka:la:miolete duwatiya ebe epo nilakapoilamelo tete ka:gopowaimene.

21 “Ebe tetelo lumagi idite la:tamo ma kunu degemene, ‘Numa:la:, Godokono Alibodawa Kelisote malo bokolita!’ o, ‘Numa:la:, ebete ebolo bokolita!’ la: nanitabokobi akomida:la:,

22 mabu elemasigi Kelisoma: eda:opi ega:walo naimano mailamo a:da: tabo kiyawaopi, iba:te pemaimiote iyaiya anoano tanalo kosiyodilolema:na:. Iyo, ibi ubila ebe osiyodilole tanalamo Godote deka:la:mioliya ebe epo iya gabamo kemagatalema:.

13:22 - Awo 13:13

23 Ebema: la: wadenomamo nolowiala:, me tanalo bilibilinomate pemaimioa:no nale la: dopamo analemata.”

Epono Naniwino Pe Tete

Ma:t 24:29-31; Luk 21:25-28

24 “Ebe kawo temeteme tetete dolopoligomene, ebe tetelo egelate kidokomene ega:walo saganate a:ka:pukuilaemene,

13:24-25 - Ais 13:10; Yow 2:10,31; 3:15; Awo 6:12-13

25 iyo, mawela:te tobolo unune opamo ka:pa:gudima:na:, ega:walo tobolo ununo elawoelawo inamabuate kalela:oma:na:.

26 Ebene ebe tetelo Epono Naniwite tobolo unune eba piwisigalo, iba:te ebe ebo kuima:na:, ebete ebenu elawago ega:walo alo kawonomago ka:pemene.

13:26 - Awo 1:7

27 Ebene ebete Unu Duliyomolono nopopi iyaiya opo bilibilinomamo kapalibolemene, Godote deka:la:mioliya ebe epo me opo apune apune ka:puwatema:.”

13:27 - Mat 13:41; Mak 13:32

Umei Kewano Tanalo

Ma:t 24:32-35; Luk 21:29-33

28 “La: umei kewano tanalone me tanalo idi wadenomamo niyatawala:. Katomono wuiate pemaimite olioli paa da:mogoiamidalema:na:, ebe tetelo la: kiyatawaomamota ulamano tete ebe netatali,
29 ebema: me temeteme tanalate pemaimilo dulama:ema, la: kiyatawaomamota Epono Naniwino pe tete tatalila, ebe gigiyudo opegama: pe.

30 Na la:tamo nani tabo gemo, me tanalo bilibilinomate dopamo ka:pemaimioma:na:, walone me tete epate ebo ka:elaoma:na:,

31 iyo, me opo ega:walo tobolo unu iba:te kolopoligoma:na:, wiyasiya naimano tabote a:kolopoligomene, uwomua: tetelo bitanamene.”

Epono Naniwino Pe Tete Epate Iyatawa:

Ma:t 24:36-44; Luk 17:26-30,34-36

32 “Numa:la:, epate ebe Kawo Egelano tete iyatawa:, Unu Duliyomolono nopopi ega:walo Godokono Gudu iba:te iyatawa:, Nabiwi Godo kapiyate iyatawala.

33 Ebema: la: olowiolo nilukuliniyala:, mabu ebe tetete da:pemene la: iyatawa:.

34 Me tanalote ma kunu kitanamene, kawo dubu idite mulu opolo ka:nokoliatepama: ebena moto wiya: wokopiatamo katepamene iba:te wadenomamo kuiminama:. Ebene ebete iba:tamo woko iyaiya ikalamotele gigiyu umidawatamo kegemene, ‘A:ma: naimano pe teta:mo olowiolo nokoliniye.’

35 Ebema: la: olowiolo nilukuliniyala:, mabu la: iyatawa: moto namutudawano pe tete, diyala, adimo tetelola:ka: o idoko tetelola:ka:, walo apuamola:ka: o duiya tetelola:ka:.

13:35 - Luk 12:38

36 Iyo, ebete samonomamo da:pemene la: laonalo da:ba:pulametamene,

37 ebema: nale me tabo la: kapiyatamo kegea:, epo bilibilinomatamo gemo, la: olowiolo nilukuliniyala:!”

14

Yu Watowatopiate Ya:suko Anakapuima: Degeliya

Ma:t 26:1-5; Luk 22:1-2; Yon 11:45-53

1 Aduga:la Soliyomu¹⁴ ega:walo Unamo Maiga: Palowa Bae Soliyomu¹⁵ ibino tanalo wagilima: netewa egelate eba na:pola:nalo, ebe tetelo Godotamo kalimagono ikameopino watowatopi ega:walo Godokono Totomu iyatulamepi, iba:te Ya:suko anakapuima: tabo ebo iyatiya, ebene iba:te ebe diya gabodo laema: gabo waditiya.

2 Iba:te negeliya, “A soliyomu tetelo ebe a:kelaema:, mabu epate atamo dowaoalo ago da:ba:gowelama:na:.”

Betani Duliyomolo Kamiyalet Ya:sutamo Wade Nibo Ii Dadipanamiya

Ma:t 26:6-13; Yon 12:1-8

3 Ebene Ya:sute Betani duliyomololo dubu idi Saimonokono motolo bae niti, ebe dubu dopamo kukulakukulagonola. Ebe tetelo kamiyalet kapiyate pete, wade nibo ii nokola kalila:mo tabokaimi adaete, ebete pitukamidate Ya:sukono watamo ebo padipanamiya, ebe ii inamabuno mailo ebe nadala, ebena wiya kawonomola.

14:3 - Luk 7:37-38

4 Epo epetapi ebolo da:pola:niya, iba:te dowaoite ibi a:ka:tuwa: ibino taneba magumulo tabo eba kiyawaolo negeliya, “Mabu keleka: ebete me wade nibo ii dologala inamabuma: da:midi?

5 A me ii manima: na:na:miditaleka: kapiya ulamano woko wiya mani buwatena:, ebene ebe mani nigologolopiatamo gito bikalamolena:.” Ebema: iba:te ebe kamiyale kawiya ebo aniya.

6 Wiyasiya Ya:sute iba:tamo negiya, “La: ebe natepala:! Ebe kawiya beda:ma: kanawitama? Ebete natamo wade tanalonomo osiyodilo.

7 La: numa:la:, nigologolopiate tete geyageyanomolo la:go bilukulionama:na:, la:imano ubi tetelo iba:tamo nilakapo inamabu ebo nikalamenakiyala:, wiyasiya na uwomua: tetelo la:go a:kokolinamo, tete tatalila nale la: ka:miyapamamota.

14:7 - Totomu 15:11

8 Ebema: nanitabola, me kamiyalete natamo wade tanalo osiyodilo, kuba idi kitana:. Nale a:ea:no ebete naimano ape bobamo iyatima: gabo dopamo osiyodilo, iyo, ebe tanalo eba malagidilolo ebete naimano apa:mo wade nibo ii ebema: adipana.

14:8 - Yon 19:40

9 Na la:tamo nani tabo gemo, epate iyaiya opo bilibilinomamo Godokono Wade Tabo datanakoma:na:, iba:te me kamiyalete dosiyodilo ebe tanalo malagidilolo ba:nikiyawaonakoma:na:.”

Yudasite Ya:suko Laema: Nopo Diyatiya

Ma:t 26:14-16; Luk 22:3-6

10 Ebene Ya:sukono 12 waloma:tapino taneba magumulo Keliyota duliyoumolodawa Yudasite Godotamo kalimagono ikameopino watowatopiatamo tote, nopo ebo niyatiya Ya:suko ibino kotamo kiyatima:.

11 Ebe tetelo iba:te ebe tanalo olowite kalakalaolo tabo ebo iyatiya ebetamo mani kikaema:, ebema: Yudasite iba:godone tote gabo ebo nowadiya Ya:suko ibino kotamo kiyatima:.

Ya:sute Ebe Waloma:tapiago Aduga:la Soliyomu Denaniya

Ma:t 26:17-25; Luk 22:7-14,21-23; Yon 13:21-30

12 Yu epono osiyodilo tanalo ma kunula, iba:te ulama bilibilinomolo Unamo Maiga: Palowa Bae Soliyomu nao dowagiliminakiya, ebe dopo egelalo Aduga:la Soliyomuma: iba:te sipi-goeogoeo egege alukolenakiya. Ebe tanalo eba malagidilolo Ya:suko waloma:tapiate ebetamo negeliya, “A tolamete Aduga:la Soliyomuno nao inamabu kebolo na:ka:nosiyodilolema:, ale a:ma:go kapimiya kenaoma:?”

14:12 - Maimi 12:6

13 Ebene ebete ebe waloma:tapi netewa eba alibolelo iba:tamo negiya, “La: kawo duliyoumolamo na:toala:, ebene obo daguwaita ebe dubute la:go dapalugomene, la: ebe ebo nowaloma:tiyala:.

14 Ebete kebe motamo ka:nodolomene, la: ebe moto namutudawatamo ma kunu na:negeliyala:, ‘Iyatulamedawate ge, moto keleka: nale na waloma:tapiago Aduga:la Soliyomu bae kenaoma:?’

15 Ebe tetelo ebete moto guamo la: kemagatalema:ta, unu motolo tete kawo bitana, iyalo osiyodilaka. La: ebolo aimano nao inamabu na:nosiyodiloliyala:.”

16 Ebene Ya:suko waloma:tapi netewate kawo duliyoumolamo nemaimite, Ya:sute kebe tanaloma: kanaliyale, iba:te ebe tanalo nulamete Aduga:la Soliyomu inamabu ebo nosiyodiloliya.

17 Ebema: didokoni Ya:sute ebene 12 waloma:tapiago ebe motamo na:pelameniya.

18 Iba:te ilukulinate bae eba naonalo Ya:sute negeni, “Na la:tamo nani tabo gemo, la:imano taneba magumulo idawate na anakapunamepi kowalubilimene na lawenema:.”

14:18 - Oale 41:9

19 Ebe tetelo iba:te tepo mibomiboma: eba eda:onalo, Ya:sutamo idawate genaki, idawate genaki, “Nalela:ka:?”

20 Ya:sute iba:tamo negeni, “La: 12 waloma:tapino taneba magumulo bae kalila:mo nago koto daduba:midamene, ebe ebe lumagila.

21 Nanitabola, Epono Naniwite a:eamo na:to, Godokono Bukalo tabo ma kunu bitana, wiyasiya kebe lumagite ebe anakapumipiatamo dikalaemene, ebe lumagite kuba wiya kawonomo kelaemene. Me ebe mabuma: ebe dubu ebenu menokote ebe alaimia:notaleka: ba:modobona:!”

Ya:suko Malagidilo Bae Nao Tanalono Wagilimi Mabu

Ma:t 26:26-30; Luk 22:14-20; 1Kol 11:23-25

22 Ebene iba:te bae eba naonalo, Ya:sute bae lawenate Godotamo kalakala tabo genate ebo wakamioni, ebema: ebete iba:tamo eba ikalamolenalo negeni, “La: nuwata:la:, me naimano apela.”

23 Ebene ebete kalili kelawenate Godotamo kalakala tabo genate iba:tamo eba ikalamolenalo, ibi bilibilinomate ebo nioniya.

24 Ya:sute iba:tamo negeni, “Godote epago milolo kilukulinama: nopo diyatiya, naimano kalimate ebe nopo kodakodaimina, iyo, me kalimate epo epetapi bilibilinomo walubilima: keka:ka:liyamene.

14:24 - Maimi 24:8; Sek 9:11; Yel 31:31-34; 1Kol 10:16; Yu Epo 9:20

25 Na la:tamo nani tabo gemo, na me tetelo me da:imi obo walo a:ka:nimo, wiyasiya Godote Kawo Elawodawama: deda:na, ebe duliynomololo na oli da:imi obo walone tetelo ebo ka:na:nimamo.”

26 Ebene iba:te Godoko amamateno oale alapionate, Olibi Kewakewa Unu Damelamo ka:tolamenama: motone gito niwitioniya.

Ya:sute Pitako Danani, A:ma:le Na Iyatawa:noma: Kegema:ta

Ma:t 26:31-35; Luk 22:31-34; Yon 13:36-38

27 Ebe tetelo Ya:sute iba:tamo negeni, “La: bilibilinomate na katepanemamota mabu Godokono Bukalo tabo ma kunu bitana, ‘Godote sipi-goeogoeo ulamedawa danakapuimene, ebe tetelo sipi-goeogoeate iyaiya kalautioma:na:.’

28 Wiyasiya Godote na a:ene walo dakadipatenemene, na Ga:lili opamo dopamo ka:tomamo. La:le na ebolo ka:punaemamota.”

14:28 - Ma:t 28:16; Mak 16:7

29 Ebene Pitate Ya:sutamo negeni, “Ibi bilibilinomate a:e tolemelo dalautioma:na:, wiyasiya nale a:ma: akatepatama!”

30 Ya:sute ebenu tabo eba wiyanalalo negeni, “Na a:ma:tamo nani tabo gemo, ka:lo idokolo kakabate netewa teta:mo geoa:no, a:ma: netewa-kapiya teta:mo na iyatawa:noma: kegema:ta.”

31 Wiyasiya Pitate kawonomamo walo na:kegeni, “Na a:ma:go da:na:emo, nale a:ma: iyatawa:noma: a:kegemo!” Ebe tetelo ibi bilibilinomate ebe atu tabo kegelaniya.

14:31 - Yon 11:16

Ya:sute Getasemanilo Godotamo Da:towetoweoni

Ma:t 26:36-46; Luk 22:39-46

32 Ebene Ya:suko ega:walo ebe waloma:tapi iba:te kawo duliyoumolone nemaimionate tatali opo ida:mo tolameniya, ebe opono mailo Getasemanila. Ya:sute ebolo iba:tamo na:negeni, “La: malo na:pola:nala:. Na me tataliamo tomo Godotamo towetowe tabo ka:negema:.”

14:32 - Yon 18:1

33 Ebe tetelo ebete Pitako, Ya:imesiko, ega:walo Yoneko, ibi towetoweo baiamo demagataleni, ebene tepo mibomibo ega:walo woki temeteme tanalo ebetamo kawonomamo ebo pelameniya.

34 Ebema: Ya:sute iba:tamo negeni, “Na tepo temeteme kawonomamo iyatawanamo, mako temetemetete na anakapuname keba kunula:ka: eba kunula. La:le naimano tanaloma: malo olowiolo na:pola:nala:.”

14:34 - Yon 12:27

35 Ebene ebete kela:mo tonate ebene ape opamo niyatinate Godotamo ebo na:towetoweoni, gabote da:modobomene ebe teteno tepo temetemetete ebe katepama:.

36 Ebete negeni, “Oe, Aba! Tanalo bilibilinomo osiyodilolema: a:ma:godolo elawo bitana, ebema: a:ma:le me tepo temeteme kalili nagodone nelawa:. Wiyasiya naimano ubia:, a:ma: a:ka:tuwa: a:imano ubila nosiyodila.”

14:36 - Mak 10:38; Yon 6:38

37 Ebene ebete waloma:tapiatamo da:peni laonalo pulamenate Pitatamo na:pegeni, “Saimono, la: beda:ma: kelawenama? Mabu keleka: la:le naimano tanaloma: tete da:pesamo olowioa:noma: deda:wenama?”

38 Ebe tetelo Ya:sute ibi nanaleni, “Godotamo olowiolo na:towetoweonala:, mabu la:le Saitanakono kuba gabamo wabuga:ta tanalamo da:ba:gudima. La:imano tepo magumulo wade tanalo osiyodiloma: ubila, wiyasiya la:godolo osiyodiloma: elawo puliyala.”

39 Ebene Ya:sute walo ka:tonate, ebete dopamo Godotamo towetowe tabo keba kunu ka:negeniyale, ebete atumu ka:negeni,

40 ebene ebete ebe waloma:tapiatamo walo da:ka:peni laonalo ka:pulameni. Ebe tetelo ibino balidite unomoma: na:elaolameni, ebe mabuma: iba:te ilipago ebetamo gela tabo nipo wadiniya.

41 Ebene ebete walo ka:tonate netewa-kapiya tetelo Godotamo na:towetoweonate da:ka:peni iba:tamo na:pegeni, “La: ela amiolo walo beda:ma: ka:kelawenama? Taula, tete a:pe, kubakubapiate Epono Naniwi ibino kotamo nelawa:.

42 Iyo, la: nemaimiala:, a na:tolaema:. Numa:la:, na anakapunamepino kotamo iyatinidawate na:pe!”

Yu Watowatopiate Ya:suko Anakapuima: Delaweniya

Ma:t 26:47-56; Luk 22:47-53; Yon 18:3-12

43 Ya:sute ebe tabo eba genalo ebe tetenomolo Yudasite peni, Ya:sukono 12 waloma:tapino taneba magumulo ebe idila. Ebene eba:go dubu bilibilinomo epetapiate ibino gowelaono gili ega:walo gaubago da:pelameniya, ebe dubu ebe Godotamo kalimagono ikameopino watowatopi, Godokono Totomu iyatulamepi, ega:walo kawokawo dubu epetapi, iba:te dupaliboleniya ebe dubula.

44 Nanitabola, Yudasite ibi iyalo ma kunu analeni, “Nale daboeteomo, ebe ebe lumagila. La:le ebe samonomamo lawa:wete wadenomamo nemagatiyala:.”

45 Ebene Yudasite penate Ya:sutamo tonomo tonate ebe nanani, “Iyatulamedawa!” Ebe tetenomolo ebete ebe eba aboeteonalo,
 46 dubu epetapiate Ya:suko ibino kotamo kodakodanomolo ebo laweniya.
 47 Ebe tetelo Ya:suko waloma:tapi magumulo dubu idite ebene gowelaono gili magoba:nate, Godotamo kalimagono ikameopino Unu Watodawanomono moto wokodawa anagaliminate, galo apu ebo mapitamidameni.
 48 Ebene Ya:sute iba:tamo negeni, “Na pilo lumagila:ka:, o na gowelaodawala:ka:? Mabu keleka: la:le gowelaono gila:go ega:walo gaubago na lawenema: da:pelama:ema?
 49 Na egela epetapilo Godoko Amamateno Iya Motolo la:go eba pokolilo epo diyatulamenatimo, la:le na ebolo kelawena:wea:, wiyasiya me tanalate a:pemaimia Godokono Buka tabono tanalate nanitaboma: keda:oma:.”

14:49 - Luk 19:47; 21:37; Yon 18:20

50 Ebe tetelo ebe waloma:tapi bilibilinomate ebe atepanate gito alautioniya.
 51 Ebolo oli ape dubu nutini, ebete dopamo wade keyakeya kalikunomo pulinate Ya:suko waloma:tapiago ebamo da:nemaigani, ebema: dubu epetapi ubila ebe kelawenama:,
 52 wiyasiya ebete ebene kaliku atepanate kikopiyanomo atumu gito kalaula:ni.

Yu Epono Ka:nisolo Dubate¹ □ Ya:sukono Tanalo Danagiyamidameniya

Ma:t 26:57-68; Luk 22:54-55,63-71; Yon 18:13-14,19-24

53 Ebene iba:te Ya:suko Godotamo kalimagono ikameopino Unu Watodawanomono motamo gito magataniya. Iba:te ebe ebe motamo magatana:no dopamo Godotamo kalimagono ikameopino watowatopi epetapi, ega:walo Godokono Totomu iyatulamepi, ega:walo kawokawo dubu epetapi, ibi bilibilinomate pelamenate ebo paladabutiniya.
 54 Ebe tetelo Pitate Ya:suko muludopone eba waloma:tanalo, ebete Unu Watodawanomono moto kala magumamo nopeganate, ebete atila:piago elalo ebo na:giga:oniya.
 55 Ebene Unu Watodawanomo ega:walo Ka:nisolo dubu bilibilinomo epetapiate tabo gelapi oleniya, Ya:sukono kuba olemenate ebe kanakapuima:. Wiyasiya iba:te ebene kuba idi kuminiya:,
 56 iyo, tabo gelapi bilibilinomate ebene tanaloma: a:da: tabo eba kiyawaonalo, iyaiya tabo degelaniya ibino tabote wiyasiya kapiyama: keda:oniya:.

57 Ebene epetapiate maiminate Ya:sukono tanaloma: a:da: tabo eba kiyawaonalo, iba:te ma kunu gelaniya,

58 “Ebate tabo degiti ale ma kunu olowitima:, ‘Me Godokono Moto epate kotamo detiya, nale anabulimite netewa-kapiya egelalo moto idi walo ka:ketemamo, ebako moto epo epetapiate etema: modoboa:.’ ”

14:58 - Yon 2:19-21

59 Wiyasiya dopo a:da: tabo kiyawaopi keba kunula:ka:, me oli tabo gelapi eba kunula, iba:te ibino tabo gela magumulo Ya:sukono tanaloma: woki kapiyama: keda:oniya:.

60 Ebene Godotamo kalimagono ikameopino Unu Watodawanomote ibino tanebalo maiganate Ya:suko nalateda:ni, “A:ma: tabo gea:noma: beda:ma: keda:wena? Me dubate a:imano tanaloma: degelana keba kunula:ka:?”

61 Ebe tetelo Ya:sute tabo gea:no gito utini, ebema: Unu Watodawanomote ebe walo nakalateda:ni, “Godoko epate ebe damamatena, a:ma: ebene Gudu Kelisotela:ka:?”

62 Ya:sute nowamini, “Na ebe ebetela. Ebene la:le na Epono Naniwi aimano Elawodawa Godokono tumudi apulo okolitalo kunaemamota, iyo, walone na Unu Duliyomolone tema magumudo kapawokalamamo!”

63 Ebema: Unu Watodawanomote ebe tabo olowinate, ebene kawo dowa tanalonomo kawokaliminama: ebete da:pulini ebe kaliku anagiyamidalenate negeni, “A me dubuno kuba kiyatawaoma: tabo gedawa idi a ubia:nola!”

64 Ebete a:ka:tuwa: kuba tabonomo dege la: olowiomata, mabu ebete nege, “Na ega:walo Godoko, a kapiyala!’ Ebema: ebene tanaloma: la:imano ubi keba kunula:ka:?”

Ebene ibi bilibilinomate Ya:sukono tanalo eba anagiyamidamenalo ebe anakapuima: ebo gelaniya.
14:64 - Kalima 24:16; Yon 19:7

65 Ebe tetelo ibi epetapiate Ya:sutamo kowe meolenate, ebene ololo mula:menate eba anagalimionalo negelaniya, “A:ma: Godokono woki awokalimidawama: nanitabolo deda:wena, a:ma: negea piyate kanagalimiotana!” ebene atila:pi dubate ebe lawenante kotamo ebo anagalimioniya.

Pitate Ya:suko Iyatawa:noma: Degeni

Ma:t 26:69-75; Luk 22:56-62; Yon 18:15-18,25-27

66,67 Ebe tetelo Pitate ebe motono kala magumulo ebene ape kenaenaiminama: elalo okolini. Ebene Unu Watodawanomono woko buwelete penate, Pitako wadenomamo pumionate ebe napanani, “A:ma: atumu me Nasalete duliyomolodawa Ya:suago pata:namiata!”

68 Wiyasiya Pitate negeni, “Ao, na ebe dubu iyatawa:. A:ma:le degeawena ebe tabo na kemalagidiloni:.” Ebene ebete kala ga:dimi gigiyamo da:toni, ebe tetelo kakabate negeoni.

69 Ebene woko buwelete ebe uminate, ebolo dilukuliniya ebe epo walo nakanaleni, “Me Ya:sukono lumagi idila!”

70 wiyasiya Pitate ebe atu iyatawa: tabo kegeni.

Ebene ebolo da:pola:niya iba:te tete da:pesamo ilukula:tepanate Pitako walo nakananiya, “Nanitabola! A:ma: Ya:sukono lumagi idilata, mabu a:ma: Ga:lili opodawalata.”

71 Wiyasiya Pitate negeni, “Godokono dopo apulo utite gemo, nale nani tabo gea:no ebete na kanaginaemene! La:le kebe lumagima: kegelawenama, na ebe iyatawa:!”

72 Ebene ebe tetenomolo kakabate geo netewa tetema: deda:meni, Ya:sute ebetamo dopamo kebe tabo kegenile, Pitate ebe tabo ebo malagidiloni, “Kakabate netewa teta:mo geoa:no, a:ma:le netewa-kapiya teta:mo na iyatawa:noma: kegema:ta.” Ebene Pitate kawonomamo ebo iini.

15

Yu Epono Watowatopiate Ya:suko Paeletetamo¹⁷ Demagatiya

Ma:t 27:1-2,11-14; Luk 23:1-5; Yon 18:28-38

1 Duiyanomolo Godotamo kalimagono ikameopino watowatopi, ega:walo Godokono Totomu iyatulamepi, ega:walo kawokawo dubu epetapi, me Ka:nisolo epo bilibilinomate nopo iyatiya. Ebema:

iba:te Ya:suko ala:mo matuomeote Paeletetamo demagatiya,

15:1 - Luk 22:66

2 Paeletete ebe nalatediya, “A:ma: Yu epono Kawo Elawodubula:ka:?”

Ya:sute ebetamo nowamiya, “A:ma:le ebe ebe geata.”

3 Ebe tetelo Godotamo kalimagono ikameopino watowatopiate Ya:sukono tanaloma: negelitiya ebete iyaiya kubakuba tanalo osiyodilolenami,

4 ebene Paeletete ebe walo nakalatediya, “A:ma: ibino tabo ba:kowamiaemene? Iba:te negelita a:ma: kawokawo kubakuba tanalo bilibilinomo osiyodiledawalata!”

5 Wiyasiya Ya:sute tabo idi kegiya:, ebema: Paeletete kawonomamo anoaniya.

15:5 - Ais 53:7; Mak 14:61

Paeletete Ya:suko A:eamo Dalibiya

Ma:t 27:15-26; Luk 23:13-25; Yon 18:39--19:16

6 Ebe tete epono tanalo ma kunula, ulama bilibilinomo magumulo Yu epono Aduga:la Soliyomu tetelo iba:te idoko motolo kapiya lumagi mailamo deka:minakiya, Paeletete ebe lumagi ebene kuba wiyane gito alibonaki.

7 Ebe tetelo kapiya dubu ebene mailo Balabasitela, ebete idoko moto gulo okolinami, ebene tanalo ma kunula. Dopamo dubu epetapiate Loma gabamaniago gowelaopima: eba eda:olo, iba:te epo epetapi ebo anakapulamiya, ebe mabuma: Loma gabamani watowatopiate ibi Balabasiko ebana uwatete idoko motamo gito alomiya.

8 Ebema: Ya:sute Paeletekono ololo apulo eba utitalo, epo bilibilinomate ebetamo pelamete napaniya, ebete soliyomu tetelo dopamo keba kunu kosiyodilonakile eba kunu walo ka:kosiyodiloma:.

9 Ebene Paeletete iba:tamo negiya, “La: ubila:ka: nale la: Yu epono Kawo Elawodubu gito aliboma:?”

10 Ebete me tabo giya mabu ebete iyatawiya, Yu epo magumulo ibi epetapi bilibilinomate Ya:sutamo nekalakalautiya, ega:walo ibino watowatopiate ebe mabuma: ebetamo dowaoete ebe gito magaiya, iba:godolo nanitabo tanalo puliyala, kitaniya:.

11 Wiyasiya ebe tetelo Godotamo kalimagono ikameopino watowatopiate epo epetapi bilibilinomatamo elawo ikalamiya iba:te Paeleteko kanama:, ebete Balabasiko idoko motone gito alibote wiyasiya Ya:sutamo kuba wiya kikaema:.

15:11 - Ali 3:13-14

12 Ebene Paeletete iba:tamo walo na:kegiya, “Me dubu la:le Yu epono Kawo Elawodubuma: degelawenama, nale ebe keba kunu nakamitimo?”

13 Iba:te gelatepaolo negeliya, “Kewa olotolowamo tupuguima:wete, ikoko nanagilamolema:!”

14 Ebene Paeletete negiya, “Beda: mabuma:? Ebete beda: kuba kosiyodilile?”

Wiyasiya iba:te kawonomamo gelatepaolo walo na:kegeliya, “Kewa olotolowamo ebe na:tupuguima:!”

15 Ebema: Paeletete ebe epo kalakalakobi ka:midilima: ubi eba iyatilo, ebete Balabasiko idoko motone gito alibiya, wiyasiya ebete ebene gowelaopi nanaliya iba:te Ya:suko pa:ka:pa:ka:mo ka:na:ma:ga:midaoma:. Ebene ebe tanalo dolopoligiya ebete Ya:suko iba:tamo gito ikalamiya, iba:te ebe kewa olotolowamo tupuguimite ikoko kanagilamolema:.

Gowelaopi Dubate Ya:suko Dekalakatitiya

Ma:t 27:27-31; Yon 19:2-3

16 Ebe tetelo gowelaopi dubate Ya:suko nemagatiya Loma gabamanino kawo moto guamo, ebe motono mailo ebe Pelatoliamala, ebene iba:te ibino gowelaopino taneba dubu bilibilino ka:la:mite iba:go ebo naladabutiya.

17 Iba:te Ya:suko eba kalakalatelelo wiya kawonomo kalimakalima kaliku ebetamo ebo pulimiya, ega:walo iba:te moeagono ale nelawete anagogobeyamidaolo a:dete ebene watamo gito pulimiya.

18 Ebene iba:te ebetamo kalakalatelelo negeliya, “Eiye! Yu epono Kawo Elawodubu, a:ma: niyata!”

19 ega:walo iba:te ebe gaubamo watolo anagalimiote ebetamo kowe meote, iba:te ebe eba kalakalatelelo ibino pupamo ilukulite ebetamo ebo tudila:iya.

20 Iba:te ebe kalakalatelelo dolopoligiya, kalimakalima kaliku ebene apene pekanamete ebene kalikunomo walo gito ka:pulimiya, ebene iba:te ebe nemagatiya kewa olotolowamo ebe ka:na:tupuguima:.

Gowelaopiate Ya:suko Kewa Olotolowamo Da:tupuguimiya

Ma:t 27:32-44; Luk 23:26-43; Yon 19:17-27

21 Ebe tetelo dubu idi Saimonoko ebe Sailiniya duliymolodawala, ebe A:lesandako ega:walo Lupasiko ibino nabiwila, ebete iyabaine kawo duliymolamo me gabodo eba pitalo, gowelaopiate ebe odiyobote ebo lawiya Ya:sukono kewa olotolowa kaguwataema:.

15:21 - Lom 16:13

22 Ebene iba:te Ya:suko nemagatiya Gologota damelamo, ebe damela mailono magumu ebe ‘Wato Goala.’

23 Ebolo iba:te elawo da:imi obo ega:walo temeteme olowia:no kaka mulamula adabulatelete ebetamo dikamiya Ya:sute ka:niya:.

24,25 Ebene egelete kela:mo da:podolatepiya 9 koloko tetelo, gowelaopiate Ya:suko kewamo tupuguimite ikoko ebo anagilamolemiya, ega:walo iba:te nokola egege iyalekeolo kalakala tanalo eba osiyodilolo ebene kaliku iyaiya uwatemete ebo alabaomiya.

15:24-25 - Oale 22:18

26 Ebe tetelo iba:te Ya:sukono a:e mabu awokalima: tabo unamo ma kunu akuloliya, “Me dubu ebe Yu epono Kawo Elawodubula,”

27 ega:walo iba:te pilo dubu netewa Ya:suago iyaiya kewamo akotupuguilamiya, idi tumudi apuamo, idi pele apuamo.

28 Ebe tanalote ma kunu pemaigiya, Godote ebene Bukamo dopamo dakuloliya ebe tabote nanitaboma: keda:ma:, iyo, ebene Bukalo tabote ma kunu itana, “Iba:te ebe kubakubapiago kapiyama: midiya.”¹⁸

15:28 - Ais 53:12

29 Ebene piyate ebe gabodo da:petolamitiya iba:te Ya:suko malogolo nekalakalatiya, iyo, iba:te ibino wato wadegelatelelo negelitiya, “Eiye! A:ma: Godokono moto anabulima:wete, netewa-kapiya egelelo walo etema: degeawia, a:ma: ebe lumagilata!

15:29 - Oale 22:7; 109:25; Mak 14:58

30 Modobola, a:ma: a:ka:tuwa: a:imano igilo mula:wete kewa olotolowa unune opamo na:piwisiga!”

31 Ebe tetelo Godotamo kalimagono ikameopino watowatopiate Godokono Totomu iyatulamepiago Ya:suko atumu na:kekalakalatiya, ma kunu idite iditamono genaki, idite iditamono genaki, eba kunu wagelitiya, “Ya:sute epo epetapino olalati tanalo mula:lalamanaki, wiyasiya ebe a:ka:tuwa: ebene igilo mula:ma: modoboa:!”

32 Ebete Godokono Alibodawa ega:walo Isalaela epono nani Kawo Elawodubuma: deda:na, modobola

ebete kewa olotolowa unune opamo na:piwisigana, iyo, ale ebe tanalo umite ebe nanitabokobi ebo ka:midimalema!”

Ebe tetelo eba:go da:tupuguilamiya, ebe dubu netewate atumu Ya:suko malogolo kuba tabo na:kegelitiya.

Ya:sute Da:eni

Ma:t 27:45-56; Luk 23:44-49; Yon 19:28-30

33 Ebene egelate tuli teta:mo dutiya opo kawonomote ebo idokiya. Ebe tetelo idokote egelano alo eba mula:lo egelate a:iwate kela:mo a:niwisigatepani, egela tuli tetene wagilimite 3 koloko uwomuamo.

34 Ebene Ya:sute Yu epono tabamo kawonomamo negeni, “Elai, Elai, lama sabakatani?” me tabono magumu ma kunu itana, “Naimano Godo, naimano Godo, na a:ma:le beda:ma: katepana:wa:?”

15:34 - Oale 22:1

35 Epetapi ebolo da:pola:niya iba:te ebenu tabo olowinate negelaniya, “Numa:la:, ebe Elayako ebe ka:mina!”

36 Ebene kapiya dubu na:puliganate umago kaka da:imi obamo naduba:midanate pudamo namogotenate Ya:sutamo eba nikamenalo negeni, “Iyaiya, a kuimalema! Elayate ebe pelawete opamo da:ba:powolukomene!”

15:36 - Oale 69:21

37 Ebe tetelo Ya:sute kawonomamo gepatenate a:enomo ebo a:eni.

38 Ebene Godoko Amamateno Iya Motono kaliku ubilite tulituliya bolegale unune wagiliminate opamo ebo piwisigani.

39 Ega:walo Ya:sukono ololo apulo dutini, ebe gowelaopino elawodubute Ya:sute keba kunu ka:enile ebe tanalo uminate negeni, “Nanitabola, me dubu ebe Godokono Gudula!”

40,41 Ebe tetelo kamiyale epetapiate Ya:suko uima: mulune putitataniya, piyate eba:go Yelusalemamo da:pelamiya, ibi ebe kamiyalela, ega:walo ibino taneba magumulo Salomiko, ega:walo Magadala duliynomolodawa Ma:liko, ega:walo Ma:li idi ebenu gudi netewa Yausesiko ega:walo Da:pesodawa Ya:imesiko, miba:te pola:niya. Nanitabola, Ya:sute Ga:lili opolo depata:nami me netewa-kapiya kamiyala:te ebe wadenomamo walubinamiya.

15:40-41 - Luk 8:2-3

A:limitiya Duliynomolodawa Yausepete Ya:sukono Ape Nokola Bobo Magumamo Diyatini

Ma:t 27:57-61; Luk 23:52-56; Yon 19:38-42

42,43 Adimo tetelo A:limitiya duliynomolodawa Yausepete na:peni, ebe Yu epono Ka:nisolo magumulo tuputupu lumagi idima: eda:nami, iyo, ebete Godokono Kawo Elawodawama: eda: tete nemakopelenami. Ebene ebete ma kunu pemalagidiloni, ebe egela Yu epono woko: egelano inamabu osiyodilole tetela mabu dumutu ebe talena egelala, ebema: ebete tonate Paeleteko tolea:no nananani Ya:sukono ape lawenama:.

44 Paeletete ebe tabo olowinate kawiya la:wa:nate wokilo negeni, “Ya:sute iyalo a:ka:eakale?” ebema: ebete gowelaopino elawodubu ebetamo ka:minate Ya:sukono a:e tanaloma: ebe ebo alateda:ni.

45 Ebene Paeletete gowelaodawa elawodubugodone Ya:sukono a:e tete olowinate Yausepetamo modobo tabo ebo geni ebete Ya:sukono ape lawenama:.

46 Ebene Yausepete wade keyakeya kalikunomo maniamo lawenate Ya:sukono ape opamo

powolukonate, wade kalikamo auptinate nokola bobo magumamo ebo niyatini, ebe bobo epate maboele nokola damela eba obobolo iyalo ebo osiyodiliya. Ebe tetelo Yausepete kawo nokola mupiamidanate bobo gigiyu ebo nemopini,
47 ebene Magadala duliynomolodawa Ma:liko ega:walo Yausesikono menoko Ma:liko, Yausepete Ya:sukono ape diyatini iba:te ebe bobo bai uminiya.

16

Ya:sute A:ene Walo Da:kemaigiya

Ma:t 28:1-8; Luk 24:1-4; Yon 20:1-10

1 Ebene Yu epono woko: talena egela tete dolopoligiya, Magadala duliynomolodawa Ma:liko, Ya:imesikono menoko Ma:liko, ega:walo Salomiko, iba:te tolamenate wade nibo inamabu maniamo nuwateoniya egela idilo Ya:sukono apa:mo kapabutilamelema:.
2 Ebene Sande egela duiyanomolo egela eba waloutalo, iba:te nokola bobo baiamo da:tolamitiya
3,4 na:negeliya, “Bobo gigiyulo ditana ebe kawo nokola balamo potele na:ka:na:mupiamidaaeemene?” Iba:te ma kunu gelitiya mabu ebe nokola mibonomola, wiyasiya iba:te wadenomamo eba meleolo, ebe kawo nokola balamo iyalo mupiamida eba itanalo ebo numiya.
5 Ebene iba:te nokola bobo magumamo nopila:ote, oli ape dubu keyakeya ga:ga: kaliku pulite tumudi apulo dokoliti numite kawonomamo nanoanoutiya.

6 Ebete iba:tamo negiya, “La: akoanoanoala:! Nasalete duliynomolodawa Ya:suko epate ebe kewa olotolowamo da:tupuguimiya, la:le ebe waditamata. Ebe malo puliyala, ebe emagaka! Iba:te ditidi adimolo ebe diyatiniya ebe bai la: numa:la:.

7 Ebema: la: tolama:wete Pitako ega:walo ebe waloma:tapi epetapi nananala:la:, ‘Ya:sute Ga:lili opamo dopamo ka:tomene. La: tolama:wete ebe ebo ka:nuimamota, ebete la: dopamo keba kunu kanaletia eba kunu.’ ”

16:7 - Ma:t 26:32; Mak 14:28

8 Ebene iba:te anoanolo anakamiago nokola bobo magumune pemaimiote gito pipuila:iya, wiyasiya iba:te lumagi idi kaniya: mabu iba:te kawonomamo toletoleutiya.

Ya:sute Magadala Duliynomolodawa Ma:litamo Danawokaliya¹⁹

Ma:t 28:9-10; Yon 20:11-18

9 Ebe Sande egela duiyanomolo Ya:sute a:e magumune maigate, Magadala duliynomolodawa Ma:litamo dopamo nawokaliya, ebe kamiyalegodone Ya:sute dopamo sebeni kubakuba uliyana aliboliya.

10 Ebema: Ma:lite tote, piyate Ya:suago dopamo dowapata:lamenamiya ebe epate eba imitalo ibi ebo nanaliya,

11 wiyasiya iba:te Ya:sukono igilamo maiga tanalo ega:walo Ma:lite ebe dumiya, iba:te ebe tabo olowite nanitabokobi ka:midia:.

Ya:sute Waloma:tapi Netewatamo Danawokaliya

Luk 24:13-35

12 Walone Ya:sukono waloma:tapi netewate Yelusalema kawo duliynomolone eba tutalo, Ya:sukono

apete iyama: eda:mete ebete iba:tamo ebo nawokaliya.

13 Ebene ibi netewapiate walo na:ka:tiya waloma:tapi epetapi kananalema:, wiyasiya iba:te ebe tabo olowite nanitabokobi ka:midia:.

Ya:sute Ebene 11 Waloma:tapiatamo Danawokaliya

Ma:t 28:16-20; Luk 24:36-49; Yon 20:19-23; Ali 1:6-8; 1Kol 15:5

14 Walone Ya:sukono 11 waloma:tapiate ilukulite bae eba nautalo Ya:sute iba:tamo ebo nawokaliya, ebema: ebete ibi kawiya analiya mabu iba:te ibino tepo magumulo kodakodaibima: eba eda:olo nanitabokobi ka:midia:, iyo, epetapiate ebene igilo tanalo umite ibi dapanaliya, iba:te ibino tabo olowite ebene a:e magumune maiga tanalo iba:te nanitabokobi ka:midia:.

16:14 - 1Kol 15:5

15 Ebene Ya:sute iba:tamo negiya, “La: opo kawonomamo tolama:wete Godokono Wade Tabo iyaiya epo bilibilinomatamo na:nikiyawaolamenakiyala:.

16:15 - Ali 1:8

16 Kebe lumagite nanitabokobi midite ebene obamo aduba:mida tanalo delaemene, Godote ebene igilo ka:mula:emene, wiyasiya kebe lumagite nanitabokobi midia:no Godote ebe lumagino tanalo anagiyamidamete ebetamo kuba wiya nanitabolo kikaemene.

16:16 - Ali 2:38

17 Nanitabola, Godokono elawo awokalima: anoano tanalate nanitabokobi midipiagodolo ka:pola:nama:na: Iyo, iba:te naimano mailamo epagodone kuba uliyana balibolenakoma:na: ega:walo iba:te Unu Duliyomolono nopopino iyaiya tabamo ba:kiyawaonakoma:na:.

16:17 - Ali 2:4; 8:7

18 Ebene iba:te kalu kotamo duwatolenakoma:na: ega:walo iba:te a:e obo da:nionakoma:na:, ebe tanalate ibi a:ka:kubailamenakoma:na:, ega:walo iba:te temetema:gopiatamo ibino koto dowatiolamenakoma:na:, ebe tetelo ebe temetema:gopiate wadekobi bolowionakoma:na:.”

16:18 - Luk 10:19; Ali 28:3-6

Godote Ya:suko Unu Duliyomolamo Dadipatiya

Luk 24:50-53; Ali 1:9-11

19 Ebene Kawodawa Ya:sute iba:tamo tabo kiyawao dolopoligiya, Godote ebe pelawete Unu Duliyomolamo ebo adipatiya, ebolo ebete Godokono tumudi apuamo gito nokoliya.

16:19 - Ali 1:9-11; 2:33-34

20 Ebene waloma:tapiate tolamete iyaiya opo bilibilinomolo Godokono tabo eba na:kiyawaolamelo, Kawodawa Ya:sute iba:go kapimiya Godokono woko nosiyodilonamiya, iyo, ebe tetelo ebete Godokono elawo awokalimino anoano tanalo magumudo ebe Wade Tabo elawokobi nimidinami.

16:20 - Ali 14:3; Yu Epo 2:3-4

__ 1) Epono Naniwi ebe Ya:sukono mailo idila. Ebe a epo bilibilinomono Naniwila, atumu Godoko ebe aimano Nabiwila.

2) Buka ka:la:mioledawa, modobola a:ma: me tanalo niyatawa, Libaikono mailo idi ebe Ma:tiyutela.

3) Ya:suko tetelo Pa:lisi epo ebe Yu epono taneba idila. Godote ibino ewoniatamo Mosesedo dikalamiya ebe Totomu Tabo, ega:walo ibino ewoniate a:ka:tuwa: kebe iyaiya tanaloma: kawokawo pukalama: degelanamiya, Pa:lisi epate ebe tanalo bilibilinomamo wadenomamo tudila:onamiya, ebene iba:te epo ma kunu eba iyatulamenalo, piyate ibino tabamo tudila:oa:no iba:te ibi kubakubapima: gelate iba:go kaladabutinakia:.

4) Biyesibuluko ebe Saitanakono nopodawa idila, ebete Yu epono opolo Saitanakono opodawama: eda:nami, atumu Tabo epono opolo Monoiko bokolina.

5) Mak 7:16 buka apuno tabo Makate bukamo kakuloliya:, wiyasiya ebene buka osiyodilo walogabo apune nanitabokobi mididawa idite akuloliya.

6) Buka ka:la:mioledawa, modobola a:ma: me tanalo niyatawa, Ya:sute Yoneko epo obamo waduba:midaoledawano tanaloma: kiyawaiya.

7) Mak 9:44 ega:walo Mak 9:46 buka apuapuno tabo Makate bukamo kakuloliya:, wiyasiya ebene buka osiyodilo walogabo apune

nanitabokobi mididawa idite akuloliya.

8) Buka ka:la:mioledawa, Ya:sute degiya ebe uli tabono magumu ma kunula, solu ebe nanitabokobi mididawano okoli tanalola.

9) Ya:suko tetelo Yu epono tanalo ma kunula, iba:te alagiote ka:molo-goeogeo kawokawonomamo ibino woko osiyodilolenakiya. Iyo, iyaiya tete epetapilo ka:molo-goeogoeate ibino inamabu watanakiya mulu opamo, ega:walo tete epetapilo iba:te pema: watenamiya.

10) Epate umei kewano mailo Gogodala tabamo salibisama: ka:minaka.

11) Mak 11:26 buka apuno tabo Makate bukamo kakuloliya:, wiyasiya ebene buka osiyodilo walogabo apune nanitabokobi mididawa idite akuloliya.

12) Sisako ebe Loma epono Kawo Elawodubunomola, opo kawonomolo ebe kapiya elawonomoma: eda:nami. Ebete ebene gowelaopi iyaiya opamo alibolenaki, ebene iba:te ebe iyaiya opolo eba nilukulionalo epagodone ta:kese mani kawonomo ebo nuwatelamenakiya, ebe maniamo ibino Loma gabamanino iyaiya woko kosiyodilolenama:

13) Ya:suko tetelo Sa:diyusi epo ebe Yu epono taneba idila, iba:te Pa:lisi tanebapino iyaiya totomu bilibilinomamo ka:tudila:onakia.

Ega:walo epate a:elaote a:ene walo kemaimiote Godotamo da:nemaima:na:, ebe tanalo Sa:diyusi tanebapiate nanitabokobi ka:midinamia:, ebema: iba:te ebe atu nanitabokobi midia: tanalamo epo iyatulamenakiya.

14) Me Aduga:la Soliyomuno mabu Moseseko tetelo wagilimiya. Ebe tetelo Isipiti Kawo Elawodubu Pa:lote Yu epo bilibilinomo uwatete ibi ebene wiya: wokopima: midiliya, ebema: ebe ubia:nola ibi gito alibolema: ibino Ka:inane opamo. Godote Pa:lokono wato kodakoda tanalo dumiya, ebema: idoko idilo ebete ebene a:e nopodawa Isipiti opamo napaliboni Isipiti epo bilibilinomono dopo gudi kapanakapulamenama:. Ebene ebe idokolo a:e nopodawate Yu epono gudi aduga:lalenate, wiyasiya Isipiti epono gudinomo anakapulameni. Ebe anoano tanalodo Yu epo bilibilinomate Isipiti opone ebo nemaiminiya, ebema: ebe tanalo malagidiloma: iba:te ulama bilibilinomo magumulo Aduga:la Soliyomu bosiyodilonakoma:na:.

15) Unamo Maiga: Palowa Bae Soliyomu ebe Yu epono soliyomu idila. Aduga:la Soliyomu dolopoligomene, egela idilo me soliyomu idi wagilimite iba:te sebeni egela tetelo bosiyodilonakoma:na:. Me soliyomuno magumu ma kunula. Yu epate Isipiti opone Godokono elawamo da:nemaiminiya, ebe idokolo ibino palowa bae osiyodilolenate wadenomamo okaleona:no iba:te gawagawalo ebo tolameniya. Mabu ebe baete unamo maimioma: tetea:nola, ebema: ebe tanalo malagidiloma: Yu epate me soliyomu bosiyodilonakoma:na:.

16) Buka ka:la:mioledawa, modobola a:ma: me tanalo niyatawa, Ya:suko tetelo Yu epono watowatopi dubu epetapi, ibi me Ka:nisolo dubula. Ebe watowatopiate Yu epono iyaiya tanalo eba anagilamelelanelo kubakubapiatamo ibino wiya ebo ikalamenakiya, wiyasiya ebe Ka:nisolo dubagodolo elawo kitanamia: lumagi a:eamo aliboma:.

17) Ya:suko tetelo Loma epate Paeleteko napalibiya Yu epono Yudiya opamo, ebete ibino kapela Kawo Elawodubuma: ka:peda:nama:, ebene ebe opolo Paeleteko kapiyagodolo elawo itanami lumagi a:eamo aliboma:.

18) Mak 15:28 buka apuno tabo Makate bukamo kakuloliya:, wiyasiya ebene buka osiyodilo walogabo apune nanitabokobi mididawa idite akuloliya.

19) Mak 16:9-20 buka apuno tabo Makate bukamo kakuloliya:, wiyasiya ebene buka osiyodilo walogabo apune nanitabokobi mididawa idite akuloliya.